

焦太史編輯國朝獻徵錄

焦大史編輯國朝獻徵錄卷之五十一目錄

工部二

侍郎

蘭芳

陳壽

裴璉

羅簡

曹弘

王永和

霍瑄

陸祥

李頤

王詔

喬殺

劉祥

談倫

張頤

杜謙

孔鏞

羅明

楊理

潘禮

李堂

夏昂

崔巖

何天衢

徐謙

江曉

蔣淦

陸杰

龔輝

郭登

黃廷用

劉伯耀

張玘

郎中

趙泰

余汝弼

吳瑞

劉汝靖

張瑋

岳倫

劉伯淵

員外郎

郭璽

劉魁

主事

宋瑛

何遵

戴鰲

皇甫濂

金陵黃應登

全枝

吳興茅元儀

錢塘徐象極 刊行

目錄終

焦太史編輯國朝獻徵錄卷之五十一

工部二

侍郎

工部右侍郎蘭芳傳

芳山西夏縣人。倜儻闊達。有大節。讀書通古今。重義薄利。不以富貴貧賤動其心。洪武中舉。孝廉授刑部員外郎。陞郎中。上卽位。陞吉安知府。先是金華朱仲智爲吉安知府。寬厚廉潔。剗革吏弊。禮賢愛民。民甚戴之。會被召改重慶知府。民思慕之。而難其繼者。已而芳至。芳寬厚持大體。明習吏事。庭無滯牘。民有

告訐者數語立決吏無所容其姦芳以愛民爲心而處事曲當民更大喜吉水有無賴民詣闕言縣故有銀冶烹煉可獲厚利朝廷遣官以其人覆視旣至父老羣訴於芳曰卽用無賴者言吾屬父子兄弟不能保而邑有無窮之患芳曰銀冶誠有之乎曰無之但聞故老云宋季時邑有姦民妄言銀冶於朝者後坐誣罔之罪今茫茫山谷上者樹松栢下者藝禾稼豈嘗見有所謂銀冶太守如疑我言詣闕告者在此請指說銀冶之處我等甘罪芳惻然顧告者而問之噤不能對父老趣之對卒無對父老又言此無賴人

無經
疏

平日所爲罪惡累累皆應坐死其人在傍聞之慄慄
芳曰毋恐罪皆赦前今獨問銀冶有無耳告者卽叩
頭吐實言我愚昧人而居鄉素貧誠不甘鄉之人皆
華衣美食揚揚焉未嘗齒我也則妄意禍之以至於
此死罪死罪惟太守吾父母何以生之芳爲草奏大
意謂告者嘗聞故老言宋時說銀冶事而未及詳輒
率意上陳今詢邑人老長皆云素未嘗有銀冶卽不
實甘受鈇質言人人同謹以實聞同官或不肯署曰
朝廷治銀冶吾輩敢方命耶奏入如不信胥受罪矣
芳曰吾輩奉命守此土非以爲民乎今 聖天子仁

明在上如天日諸公乃不以直道效臣節耶有罪芳
請獨任卽自署奏同官不得已亦強署焉 上得奏
曰吾固意愚民之妄也遂罷其事然以告者出於率
意也亦不之罪芳自奉儉約日嘗蔬食被服無統綉
事其母極孝母亦善教凡芳日所行事夕則命陳于
前有未善必讓之芳謹受教不違後爲工部都水主
事督浚治河南河渠凡所經郡縣民情吏治有未便
者輒疏以聞陞本部右侍郎至是以疾卒吉安自芳
去其民思慕賢守必曰朱蘭朱蘭云

工部左侍郎陳壽傳

工部左侍郎陳壽隨州人永樂初舉鄉貢下第入太學擢戶部主事陞員外郎山東叅政六年尚書夏原吉言其賢召爲工部左侍郎壽有學術內仁外和居官小心勤慎所至以恤民爲務初侍上監國南京日以兵民所困入啓上悉爲寬貸壽問言曰殿下推廣上德以及黎庶此當然事惟比來左右干恩澤者多恐累明德宜抑之深見嘉納嘗啓事退上目送之顧侍臣曰此侍郎中第一人後坐累下獄家具蕭然不給朝夕官屬有饋之者拒不受既卒贈年

家人啓殯容色如生云洪熙元年 上思先朝舊勞
贈本部尚書諡肅敏

裴侍郎璉哀辭叙

王直

公裴氏諱璉字汝器監利人初遊學郡庠年甚少已
嶷然如巨人長者久之陞太學擢知劍州三年陞浙
江按察僉事改江西坐累謫興州太宗在位召爲
北京道監察御史陞河南按察副使又以累謫武清
復被薦爲廣東道御史仁宗在東宮雅知之擢春
坊中允改大理評事又改刑部主事坐事降易州同
知洪熙初圖任舊臣陞工部侍郎改北京行部又坐
事去知涪州子綸爲翰林編修得推恩及其親公
遂棄知州就封以翰林編修文林郎致仕宣德十年

三月十三日以疾卒于家年七十二公天資俊爽負
奇氣眉目明秀議論英發率嘗傾一座其才敏過人
富義而行無顧忌初在劍州州產茶民衣食之而爲
有勢者所擾公奏請禁止至今民賴其利爲僉事在
江西鉏惡佑善所至吏畏而民愛之其於賢者維持
成就如所親及爲御史彈劾不避權勢河南皂軍山
寇發公受命往察之還上討捕方略寇遂平階州
賊王金剛奴等僭名號聚衆八千餘人勢悍甚又命
公往公得其巢穴以計擒之而請釋其餘上初遣
公謂還當大用而用事者嫉公絀其謀間疎之不召

見而罷其爲侍郎尤侃侃自信敬恭朝夕有大臣之
體在劔時興學養士至親爲講說賞勤而勸情諸生
多賴以成流風餘澤今尚有存者蓋公之志翼然出
儕輩故所至有立予之知者如此予所未知者計亦
偉特猶是也平生清約自持不苟取妄求仕四十餘
年如一日雖累遭譴謫皆非以私過得之故每斥輒
復晚節優遊以榮名終享有盛福此好德之驗也予
爲諸生時已獲瞻風采其後同朝又深知公嗚呼今
不復見矣

通議大夫工部右侍郎寅菴羅公簡墓碑

王英

太宗皇帝以聖神文武之德入正大統制作禮樂修明典章興舉政事尤夙夜孜孜廣求賢才以圖治理歲甲申廷策進士得四百七十二人取士於斯爲盛而選入翰林績學以揆擢用者得二十八人當時以爲遴選之至與其選者吉水羅公尤卓然有所抱負者也公諱簡字汝敬性穎悟方七八齡賦詩輒有奇句稍長受經於仲兄汝弘窮探博究旁及百氏學以大進補廬陵邑庠生遂舉於鄉第進士與選入詞垣

是時嘉祥疊見朝臣多獻詩頌公所作長篇短章詞
氣浩然超出同輩擢翰林修撰扈從車駕巡歷北京
所經山川風俗多有歌詠九載陞侍講修 高廟實
錄賜襲衣寶楮 仁宗皇帝臨御天下公言時政十
五事降雲南道監察御史且令掌道蓋公所言過直
故降官然亦以其敢言有學識使歷風憲可大用也
公執法持正理冤獄多平反者 宜考嗣位交趾黎
利弗靖成山侯王通等用兵無功陞公工部右侍郎
與李琦等齎璽書諭利未至而通與利和自率衆出
境矣衆止公勿往公曰王通師敗辱國我受命諭賊

可退縮不進乎賊雖凶暴必不敢拒詔與琦亟馳至
其國宣上恩意利惶愧率其屬拜自首其過遣使
獻金又奉表詣闕稱謝且請立陳氏之孫曷復命公
往立之旣至利以曷已死乃張筵列女樂設宴公叱
曰曷死爾國人安可淫樂盡擊破其尊罍樂器時天
晴忽陰雲起大雨雷震焚利居室利懼貢方物表謝
還朝督兩浙漕運奏減荒田稅糧陝西言邊地腴田
爲權豪占奪致糧儲不充士有饑者命公往理之公
劾守將之貪暴者取田爲權豪所占者經度頃畝均
與細民糧賦倍加邊儲充足增置倉庾立輓運之法

省民勞力又奏置河渠提舉官專掌水利而邊臣不
得爲姦利者輒加誣謗公還朝言之詔勿問命公復
往今 聖天子卽位之元年西虜有寇邊者遣將追
捕公督糧餉至紅子城之地忽遇虜飛矢如雨中公
左膊墜馬虜環聚以鋒鏑加其身欲害之一老酋與
衆款語良久乃舍之而從行吏卒皆被害方公之遇
虜也運餉者遙匿草澤中見衣緋者數人在公左右
若衛護之狀及公無恙咸以爲神助云公在陝久有
言其多疾者召還賜致仕鈔給驛舟還鄉時正統三
年五月也後一年終享年六十有八訃聞賜祭葬

工部右侍郎曹弘傳

弘字文淵湖廣長沙人永樂乙未進士授刑部主事陞員外郎宣德庚戌朝廷以東南諸處糧賦不充而民疲於趨事特命廷臣薦可當重任者往撫治之得弘等五人俱拜爲侍郎弘受勅巡撫山東淮揚等處事集而民不擾一方賴之以安至是得疾卒于揚州年四十有八訃聞遣官諭祭有司歸喪治葬

工部右侍郎贈尚書王公永和碑銘 陳循

正統十四年秋七月 車駕親征虜寇崑山王公以
工部右侍郎在 從列八月望日陷沒於土木明年
朝廷推恩追贈公爲工部尚書遣官諭祭公諱永
和字用節姓王氏自號梧竹世爲姑蘇之崑山人習
尚詩禮公大父諱允吉父諱子禎皆以公恩贈通議
大夫工部右侍郎大母顧贈淑人母周封太淑人公
生神氣爽邁異於常見大父見之指曰是兒必振吾
家幼時有誘以學奕者公曰是惡足學取其枰立碎
之旣而從學邑庠日記書千餘言久而不忘大父得

疾公日躬侍湯藥至廢寢食父有疾伏枕十八年公無頃刻少厭怠臨卒語公曰吾病不能養老母賴爾能孝吾瞑目無憾矣其孝行見愛於親率類此年踰弱冠以明經舉永樂甲午鄉貢以大母及母皆在堂未及會試後卒乞就教官以便親養得嚴州府儒學訓導尋丁大母憂去服除改任饒州府學所至誨導諸生多有造詣至於誘掖所司作興學校獎進賢才尤惓惓焉以爲已任歲滿與同以教官考績至者羣試於吏部公之名在首選吏部尚書蹇公獨器重之暫禮致爲塾師比當除奏爲兵科給事中居官務持

大體而略細故人以為得近侍之體嘗副駙馬都尉
王誼為使持節行冊親王禮糾正受冊執事之儀
觀者為之凜然還掌科事秩滿超遷都給事中未幾
擢工部右侍郎預董營建宮殿之事殫力盡心不
知勞而事速濟為同僚所敬服嘗往巡視淮南諸郡
旱蝗訪求民所利病悉得其實而致便宜於民比還
特受命掌部事奸弊為之一清河決山東河南諸
郡改而北注清河被其潰溢公受命往治之濟漑有
方軍民受其惠者不可勝計比還遂以能事簡預扈
從竟殞於國事云其妻陸淑人有賢行初公隨征未

歸淑人驚悸欲絕久而復甦自是聞變哀痛無虛日
竟以成疾而卒今同葬於吳縣玉泉之原

工部左侍郎霍公瑄傳

陸簡

成化六年五月初二日工部左侍郎霍瑄卒瑄陝西鳳翔縣人發身鄉舉授山西大同通判久之以薦陞知府正統十四年英廟北狩逆酋也先擁衆奉

車駕至城下守城者戒嚴不敢啓瑄感慨奮不顧身從水竇匍匐出謁叩馬嗚咽進膳羞靴袍百物悉出府藏金帛以犒虜衆英廟深致嘉嘆秩滿遷山西左叅政食正三品祿仍掌府事英廟復辟召陞工部右侍郎未幾轉左明年賜二品服帶成化初因嘗其屬司郎中何經被經訐其不法事以聞朝廷雖

不之罪然瑄山足鬱鬱不自安尋以老乞致仕居京
師久之不歸至是卒瑄質樸少文勤於幹理大同一
節尤出一時忠愛惻怛之誠故寵遇始終時不以爲
過也

工部左侍郎陸祥傳

工部左侍郎陸祥直隸無錫縣人初以石工隸工部
鄭王之國選授工副後有薦其有異技者召改工部
營繕所丞營作稱旨祥有老母病或以聞命光祿日
給酒饌并鈔五錠以爲養擢工部主事進郎中以至
侍郎祥巧思嘗用石方寸許刻鏤爲方池以獻凡水
中所有魚龍荇藻之類皆備曲盡其巧然爲人頗謹
愿士夫不以其出自雜流而棄之子華以譯夷字遣
館閣歷官光祿寺署正成化五年十二月卒

工部右侍郎李顥傳

李顥字思誠廣東博羅縣人正統丙辰進士由刑部主事擢福建按察司僉事未幾陞叅政綜理海道景泰丙子調任于山東天順戊寅進右布政庚辰入覲時天下官旌異者僅十人而顥預焉賜宴于禮部兼錫金織襲衣轉左布政丁父憂改浙江成化丙戌召爲工部右侍郎錢塘江溢衝啣隄岸壞民田廬往治之人賴以安居還朝年六十有二以疾乞歸成化十六年六月卒訃聞賜祭葬如例顥廉靜寡慾不事聲名歷官中外皆著政績爲時所稱其在閩莆民有游

益綱者伏中官勢爲鄉里大害無敢誰何之者願至
除之至今閩人稱頌不置云

工部左侍郎王詔傳

王詔字伯宣湖廣衡陽縣人正統壬戌進士授禮科給事中景泰中以事去官天順中復起仍舊官未幾進都給事中成化丙戌擢通政司右叅議命總易州山廠陞工部右侍郎仍治廠事尋轉左入理部事九年秩滿仍舊職加正二品俸庚子本部缺尚書而右侍郎劉昭越次補之詔不樂遂請致仕許之給驛舟還家道卒時成化十六年八月訃聞賜祭葬如例詔爲人儉素簡重居官亦多可稱者但己巳之變以憂制避去後雖辯明復官議者終非之

工部右侍郎喬毅傳

喬毅字志弘山西樂平縣人正統戊辰進士改翰林院庶吉士擢吏科給事中進都給事中天順戊寅陞大理寺右寺丞成化乙酉遷左少卿庚寅陞工部右侍郎成化九年九月卒于官賜祭葬如例毅寬和質實表裏一致不爲矯僞之事性復儉素雖居顯位不改其常子鳳亦舉進士官至兵部郎中

工部左侍郎蒯祥傳

木工

蒯祥直隸吳縣人以木工起隸工部精于其藝自正統以來凡百營造祥無不預積勞累官營繕所丞太僕寺少卿工部右侍郎進左侍郎食正二品俸又以考滿陞俸一級祥爲人恭謹詳實雖處貴位儉朴不改常出入未嘗乘肩輿旣老猶自執尋引指使工作不衰成化十七年三月卒于位年八十四賜祭葬如例

通議大夫工部右侍郎談公倫墓誌銘

王 鏊

公談姓諱倫字本彝其先有仕宋爲博士博士生宗
遂宗遂自開封扈宋南渡家吳興復遷上海族日蕃
大曾祖諱季芳始以族大爲懇痛自抑損散財積書
人謂之癡 國初諸巨族皆謫戍人始服其識祖諱
節考諱景瞻皆贈通議大夫工部右侍郎公長身豐
頤瑩然玉立景泰丁丑登進士觀政吏部時鹽山王
忠肅爲冢宰風岸孤峭意輕南士見公瞿然曰南方
有此人耶因授驗封主事甫一年擢員外又擢郎中

公性開朗又善承忠肅意忠肅愛之英廟每召見

忠肅輒以公隨上問之忠肅以公名對曰臣老矣

於聖諭恐有遺忘此郎代臣志之且其人可信也

上因欲大用之忠肅謂公年少資淺他日用之未

晚久之丁母淑人憂服闋至京則濟南尹公爲冢宰

補虞衡司三載擢應天府丞鳳陽大水尹京者不敢

以聞公自署其奏是歲詔免秋糧數萬進尹應天改

順天會軍興橫索民車以千數公許以百兩不可借

之不可再倍之又不可乃具以聞詔以百兩與之自

是軍士無敢橫進工部右侍郎筦易州新政搜逋挾

隱剗削奸蠹歲得羨餘若干萬會南昌人李孜省以左道倖尹公子龍被逮尹公以是去公亦隨之初公受知忠肅忠肅之病也日侍湯藥于左右忠肅臨終以公託崔尹兩亞卿兩亞卿亦自才之故公往來三家如家人父子時萬文康在內閣有憾於尹因孜省媒蘖醞釀以成其獄士出尹公門及山東者盡逐之朝班爲空尹公之門無敢闖焉公於尹最厚其行也又往餞之故及今上登極公道昭宣孜省伏誅謫逐者多召還而公竟不起年七十五初公家居歲遣人起居尹公於山東忠肅之卒也祀之別室崔公

歿亦如之尹公亦如之蓋其篤於所事如此於乎公之才識固遠到器也不幸屢爲當道諸公所知或推或輓卒以顛殞是獨何哉其亦可慨也已

工部右侍郎張願傳

張願字養正其先直隸江都縣人後占藉山西太原衛天順四年進士改翰林院庶吉士授檢討陞修撰擢都察院右僉都御史巡撫宣府時太監汪直北征願曲意諂事遂以軍功轉左尋陞工部右侍郎成化癸卯被劾致仕弘治十三年八月卒賜祭葬如例願本有才氣而急功名平居持論侃侃恒出人右在翰林其榮進自有素定願求自試用于外旣而患失心勝遂不能堅其節士論頗薄之亦惜之云

工部左侍郎杜公謙墓志銘

公諱謙字益之先世中山人元季始徙昌黎曾祖彥
文祖復祖考敏皆邑之聞人而隱居不仕公旣貴始
封爲工部主事加贈本部左侍郎妣王贈安人加淑
人祖考妣之贈如考妣所加公初舉進士適 朝廷
欲輯天下郡志爲一編簡新進士分往諸藩服採摭
事實公奉命往山東還授工部都水司主事專理徐
呂二洪甫三載以例代還改禮部主客司尋署員外
郎轉郎中以父憂解任服闋改儀制司用尚書姚文
敏公薦超遷浙江右叅政六年陞右布政使又明年

轉左入爲順天府尹未幾擢工部左侍郎始終凡八
轉官歷任三十有四年散官至二品致仕後再奉
詔進階資善大夫公初筮仕卽淮徐呂二洪洪當運
道中迅流立石齧齧如齒列盤渦盪漑舟稍失制則
人與貨俱沒公至相其地勢詢其水患稍加平治舟
賴以濟歲適歉山東淮北流離饑餓之民叢集兩岸
隨舟上下號呼乞食公設法勸率得米爲淖糜以食
之全活甚衆改注主客司時天下承平化外番夷及
內地土人朝貢者雜還不絕公點視彼輸獻方物酌
量我回賜綺帛必稱其直遠人安之儀曹居四司之

首一代禮儀典則攸屬而藩王奏請求取無虛日公
撓例據理處之咸當遇歲大比士偕計至者三倍往
時往往恃衆譁闕公約束之以禮舉循矩度京尹之
任尤爲煩劇百需所出百責攸萃公處之裕如也旣
不拂權倖又不厲下民衆稱其得體在浙藩十有三
年其施爲建制多可爲經久計者至今循行之天下
每歲上供綵段惟浙最多近比有造作不如常度者
輒坐其闕視之官之罪藩司分守官每當闕視輒推
延以避罪責有積數年更數人者積久蒸滯多損壞
以致重造多費公初至闕視凡諸郡累年之積次第

閱訖卽上進繼公者踵之自後官府閱進以時民免
破家佐工部時漕河淤塞糧運不繼衆議舉公往任
修浚之事公自通州循河流以抵淮揚相地勢去淤
塞導源泉修牾壩漕河復通竣事復命 上嘉之有
文綺楮幣之賜先是尚書余公子俊築榆林一帶邊
牆已獲其利又請推其法於大同用功已什六七矣
或者訐其用度不貲多有乾沒且傳致其罪 上勅
公偕科道官往覈其實瀕行有以危語怵公謂 上
意叵測公佐藩司嘗與余同寮宜以嫌辭公不顧遂
行至宣府不與余相見悉取前後案牘與凡出納之

籍坐公館與科道官一一檢閱召凡收支領用者人
人覆驗之無不合又究其根由條分縷析事核情顯
余公之誣遂白 朝廷釋然公歸 陛見賜以楮幣
議者謂公平生行事此舉大有關係蓋以余公城邊
鄉人有主之於內者所主之人與其同事者不成故
嗾人訐余非公卓有定見而敢任其咎余公必不能
保全云公性寬大深厚而其心仁慈惻怛人無貴賤
皆爲之盡禮雖欺罔誕謾一以誠報之尤樂道人之
善人有過多爲掩覆庇護甚者相負背亦不忍傷其
意平居怡然能自娛適待宗戚鄉里極恩厚與人交

游始終無間其爲政以忠厚仁恕爲本所至有惠利
於人在浙藩久浙之士民至今稱頌其德晚年家居
以身爲教卒之日閭郡之人無不嗟悼公天性孝愛
跬步不忍離父母方爲郡庠生卽以家事付諸兄奉
二親居郡城旣入胄監亦奉以行其後之官呂梁及
前後侍 朝署未嘗一日不在親側及任浙藩俸益
厚而親不待矣時兄姊已老乃迎于浙藩事之如所
生南方多珍味每遇佳景對盛饌必惻然動思親之
念若公者非但國之良臣其亦家之孝子也歟

工部侍郎孔鏞傳

公諱鏞字韶文姓孔氏宣聖五十八代孫也元季高祖克信始自曲阜遊學江南阻兵不歸而居蘇州父友諒舉進士知蜀之雙流縣公幼孤好學甫弱冠爲長洲縣學生時提學孫御史鼎教人務先德行學置一籍名敦本首著公名于籍公用是奮發益力于學登甲戌進士第初知都昌分民戶爲九等以均賦役設倉于水次以便收斂縣濱彭蠡每風雨波濤澎湃若有物蜿蜒其中舟多覆者相傳以爲纜精過者望而祀之偶歲大旱公往驗之乃巨木歲久爲荇藻所

絡若麟介然公火之其妄遂絕尋以弟銘選尚寧
府郡主例避嫌改廣之連山連山西連昭賀徧徃出
沒無寧歲公至縣治無廨宇可居俸給殆絕父老間
有至者詢知民所在遣人招之不來公親詣其地民
見公至驚走旣而公炊飯民舍輒留錢米以償其薪
水之費乃相率還拜伏道左公一一賑恤之俾復業
由是起事縣中縣治始復踰年大兵征廣西巡撫葉
都御史檄公率民丁隨軍征勦公所至招徠不事斬
艾賊聞風降附諸將有欲殺人取馘者公必力爭之
全活者甚衆時廣東州郡之界廣西者無不殘破而

高州尤甚僉謂公有撫綏才薦公試知府事高州城外四山皆賊壘僅餘孤城城外積屍如京觀民外死於賊內死于疫城中軍民不滿百公至首呼父老問計咸曰城中人多有賊之戚屬切宜防之其來趨城者其心不可保惟宜閉門固守公曰不然高州本無賊而賊之來也皆自廣西往時守土者無遠圖民攜家屬十百里來投城將以求生也乃閉門不納以致爲賊所羶醢其在城中者又疑之或加害焉用是賊以是激怒其衆外攻而內應往時城陷正坐此也乃大開門有來者無不納而在城者相染成疫曲加撫

摩調養死者爲義塚于城外以瘞之流毗聞風來歸
日以百數城不能容公卽城東北隅築土爲城以居
焉時賊屯高化境者凡十餘鄧公長據茂名之茅峒
馮曉屯化州之西北界梁定屯畬禾嶺鄧辛酉屯于
遊魚寨侯大六屯于信宜界皆剽盜也惟茅峒距城
僅十里而公長尤黠驚公屢遣人撫諭之使退不從
公不告之僚屬不謀之妻子黎明潛呼四疲卒肩輿
出城徑抵賊巢公長見太守至倉皇不知所以亟呼
其黨擐甲出迓怪公無騎從遣人遠偵回報無所見
乃釋甲羅拜請公入坐定公從容諭以逆順禍福指

天定約公長意猶豫而衆酋感悟泣下恨公來晚公
長跪奉卮酒爲壽公飲之不疑衆齊喊舞約降護送
公回夜四鼓遠近見火起賊自焚其巢也衆明開門
納降者得數千人公長旣降諸賊聞風次第納款馮
曉久屯化州界結土民以爲內應久招之不服公詒
以備他盜整兵夜進遣部下蒙浩率敢死士二百餘
截其後而公以前軍應之二鼓擣其巢曉遁去執其
妻子以歸曉意必戮其妻子也官軍屢招之不出旣
而聞公存撫甚厚也遂以其黨五百來歸事聞有文
綺寶鑑之賜特陞廣東按察司副使賜 璽書褒獎

俾仍守其地於是梁定侯大六鄧辛酉皆受公招撫處之內地分地與耕且爲我備他盜公部下有黎浩林雄數人皆有謀勇而雄尤爲拳捷後死於賊公撫尸慟哭親爲殯葬一軍莫不感泣用是民夷咸畏所至成功高州人懷公德惠立生祠祀之公聞母喪還守制軍民泣送有出千里外者服闋改官廣西諸州猶獯聞公名有素相率遠遁未幾陞按察使賊起自荔浦來寇總督朱都憲屬公督軍勦之賊相顧愕然曰此高州孔憲副邪是不可敵也亟趨去公一鼓平之事聞進階食二品祿賜文綺寶鑑尋陞左布政使

蒞事甫半月陞右副都御史巡撫貴州賜勅許便

宜行事公益殫心力清平都勻二衛苗人據險肆掠
垂二十年公至適來爲患公督諸將授以方略次第
勦平邊徼無事公釐革諸弊奏請以貴州囚徒之戍
雲南者撥補本處沿途驛遞軍夫之缺而給與月糧
增設布政司官一員以專督糧餉皆前所未有也其
他如省冗費黜貪殘減抑軍官之僭從平反冤獄諸
事皆足以厭服人心公清心介行所至人望而愛之
咸知其爲厚德君子也故言出而人信之事行而人
無異議今上初卽位公上章言歷任三十餘年無

一任不在邊方冒觸瘴毒積濕成疾乞致仕上不
允既而念公久勞於外陞工部右侍郎召還道浙河
而卒於富陽舟中弘治己酉九月三日也享年六十
有三訃聞遣官諭祭命有司營葬事

工部侍郎羅公明傳

雷禮

羅明字文昭福建延平府南平縣人成化丙戌進士
拜河南道監察御史初奉勅清理浙江鹽法均徭
戢橫權豪斂跡繼巡按廣西適有內批命鎮守少
監黃泌貢其地之所產禽鳥明奏止之行部所至憲
度嚴整首汰其貪吏之尤者境內肅清還掌道事會
冢宰員缺朶頤者衆遂率同列上疏謂宜公議推舉
必得才德兼茂聞望素著方可委任若授之匪人所
關不細由是奔競少戢京城東直門灾朝廷範白
金爲真武像遣中黃門送武當山崇祀以弭灾變明

考察
被法
而復
職行
幼之

復率同列上疏以爲徒費財擾民而無益於事又因
災異迭見率同列陳言脩省因及鑾輿遊幸南城
西海賜賚無度非敬天弭災之道時有大臣以賄罷
而資緣復進者又有近倖越例奏請得錄其幼子入
監者又有方面以考察被汰而妄訴屈抑得復職者
明俱率同列奏乞追寢前命時論避之遷陝西按察
司副使奉勅撫治漢中漢中多深山茂林爲遁逃
淵藪明奏立白河縣以安輯之尋以內艱去民送之
者遮道涕泣不忍舍起復仍副陝憲會屬州民有在
嵩洛竊發銀鑛因誣逮平民論死者四十餘人明爲

辯雪坐者三人而已俄遷本按察司使值歲旱饑人
相食明爲求所以拯濟之法無所不至仍條救荒二
十事上之多所施行活人甚衆遷雲南左布政使明
以其地去京師最遠民夷雜居爲政務從簡易不
事苛擾論者以爲得體未踰年擢都察院右副都御
史奉勅巡撫甘肅其地卽古河西五郡也控引西
域流沙諸部落番胡叅錯號稱難治明居陝日久稔
知其宿弊首奏罷貢獻以息橫斂復奏奪勢家所擅
草湖之利以還軍士他如均水利清兵馬蠲逋負多
所建明其於學校風教尤盡其心嘗奏請增貢額以

振掩滯又選秀民著錄庠序以教養之先是甘肅祭
先聖率用俗樂明至命所司講求禮制備古樂舞器
服而演習之八音旣諧遂奏以奉祭邊方之人至是
始知有雅樂而一洗前日之陋也弘治己酉東路有
小警且有詔錄囚徒明舊苦中煩疾至是以勞復
作遂卒卒之後旬月朝廷以其有區畫哈密之功
降璽書褒獎尋以工部右侍郎召還皆不及見
矣明爲人外和內剛歷官二十餘年清介勤慎始終
一致人未嘗見其有過舉云

工部右侍郎楊公理傳

潘 墳

理字貫之舉成化丙戌進士歷官刑科給事中左給事中
都給事中叅駁詳允有所舉奏不務急刻充

宣寧王府冊封副使不受餽賚同考禮部時稱得人
奉 命覈大同宣府閒地爲豪勢所侵者請給貧民
入其租遷鴻臚寺左少卿尋改大理寺左寺丞詳獻
任平恕勘 陽曲王府獄事涉疑閣陳 朝廷親親
之義 王以下感泣服罪解誣逮者若干人領武選
貼黃事進都察院右副都御史巡撫河南值歲歉河
大決汴城幾墊有議遷改者民心洶懼公曰遷豈易

事乃增築汴隄高厚禱於河水亦去又禱雨於南陽
諸府雨輒至湖廣饑民流入盧氏永寧將構亂躬往
撫諭發銀穀賑之有司請俟奏報曰事在不測俟奏
報民死且盡去爲盜如以爲罪某當之比勅至悉如
所議全活不可勝紀趙王府獄事尤重爲陳父子慈
孝之道王寤事遂寢姦人以民田詐爲閒地投獻諸
王府朦朧陳乞一一疏其情請申禁例汴多貨集官
先立市魁爲行頭商賈受制乃一切革去民皆便之
禮遇羣吏詢民疾苦暨政令得失人人得盡陳所見
因采用之尋陞工部右侍郎階通議大夫徵書至民

老稚遮道不忍釋在部愈勤慎修沙河橋旅茆旁舍
軍夫赴役者時致慰勞會苦寒請暫停役及春從祀
南郊歸得疾訃聞上遣官諭祭命有司營葬年六
十公邃經學爲文簡勁言溫氣蘇若無官者尤好汲
引後進有片善獎藉不容口僕吏非大故不加箠撻
卒之日無貴賤疎戚咸悼惜焉

工部左侍郎潘禮傳

工部左侍郎潘禮字嘉會河南歸德衛人天順庚辰進士授給事中轉左給事中擢通政司叅議右通政以憂去服闋改南京入爲太僕寺卿管易州山廠遷工部左侍郎任如故廠有贏利禮一無所取由是以廉潔知名弘治中三疏請老進資善大夫給驛歸歸十三年爲正德丙寅于時年八十有一矣草舍飯蔬意恬如也巡撫河南都御史韓邦問言于朝詔有司月給米三石以示優老養廉之意初歸德有河患禮歸乃居鄉一日寇至無可取物禮曰有酒可飲寇諾

羣飲之去禮緣是復居城中然簡交際在城中常徒步出城乃御車其敦朴如此正德三年十一月卒其鄉人愈益稱之

工部侍郎李堂傳

雷禮

李堂字時升別號堇山宋丞相昉之後七世祖翼南渡時仕慶元郡因占籍於鄞居郡城之孝聞坊堂孩提卽穎異八歲日記數千言屬對敏給往往屈其坐人傳誦至今甫成童受知於董學新喻胡侯榮考最卽廩於庠弱冠登成化癸卯鄉試丁未上春官安成劉景元名重詞林慎許可分經掄秀深嘆奇之已亞易魁人猶稱屈大對成進士展省東歸方樂具慶蔡軒公忽疽發於背公爲吮之弗瘥太淑人和繼考終哀毀踰禮幾不欲生終制久之方謁選授工部屯田

司主事東鹿司空賈公一見語合選差監稅竹木於
無湖先是中貴宋昂貢緣內批指取 御木張甚沮
遏商人公至務從寬減雖虧課重得罪弗計刮剔宿
蠹照上年解額存留羨餘籍記以充後解宋意銜之
所知每懼之以禍曰吾非不知宋爲要人亦欲順適
其意其如羣小觀望規利何苟此隙一開倖門益啓
國課愈塞吾以身任之力杜其漸他尚奚恤自是此
輩卒不踵差已而復部賈公喜動顏色曰倍宜對讀
題稿案簿少作詩文一志在公尋陞營繕司員外郎
猶以是司雖劇剝而不咸奏調屯田司 詔修大明

會典委造工典文冊史館取用不遺又集屯田題稿
議免取畫土及銅鼓人匠議革南京蘆洲積弊議禁
易州廠科罰議革順天府功臣太監墳夫議減後府
柴炭價銀議添差科道官監收巾帽局皮張議惜薪
司掣柴雇役等數事案呈申明著令大拂權倖衆方
危之迄守正不動陞管繕司郎中益感遇恩奮清寧
宮災係 太皇太后寢闈 不廟聖孝益虔手勅營
建公議請發 內帑免徵天下計蘇民困迴天戒維
議抗言減原計之半工成存積動支之數什三是時
提督英國張公懋兵部尚書馬公文升工部尚書徐

公賈等廢賞有差聯章保堂翊扶 聖孝勞勩奉

溫旨陞京職二級公三疏辭免略曰營繕乃臣子職

業之當爲錢穀尤士類名檢之所惜宜循常資敢膺

殊典以招物議銓部多之上請 上亦俯順其謙仍

陞俸二級嗣歲 勅建禮部與修闕里費皆前積所

遺民用不擾司空益倚重之委專覆兩京建白事條

及集是司題稿罷築兵部奏請京師外城與御史王

約建京師輔城止添蓋國子監道德高原教化無窮

二表門停南京內府不急工程取回燒造饒器內臣

痛抑寧府請益琉璃瓦價及吉鄭等王府非時造作

府丞
分派
屬縣
理訟

議霸州葦地徵租太重元宵燈火糜費太濫如屯田
集議著令加覈焉曰所愧聚斂不如盜臣欲免聚斂
先革盜欺諸役之大誠非得已既寬坐派而存積不
貲以備急乏此皆孝廟優容小臣少效微涓爾何
能爲哉太宰倪文毅公雅相器重剡薦太常寺少卿
吏科給事中王洧等疏公資望而薦之決黃冠者竟
沮止之復以應天府丞薦命下衆乃驩馳往事事分
蒞屬縣剖理詞訟檢查錢糧句容縣給事中趙欽罪
犯不法連坐無辜淹禁屢歲公承委片言折之成獄
獨置欽重典遠近稱快高淳溧陽句容縣姓孔大戶
賦徵錄 卷之五十一

詐稱聖族脫漏科差究竟一體執役建平縣歲饑吳
廣五等聚衆假以稱貸搶掠間有相守望禦侮殺賊
訛言驚衆洗勦幾激大變公單騎諭以禍福衆感泣
執獻渠魁以殉脅從者慰遣歸農當道避之以口舌
代甲兵可屬大事織造內臣崔侃越分科擾力奏止
之民始聊生正德丁卯應天鄉試有賄通關節巧取
高第者人言沸騰往歲付之不知以致益無忌憚公
提調是科顯詆黜之者三人爲國薦賢於斯爲盛御
史聶瑄奏當超遷丞弼奉命歷試南京光祿寺卿四
年陞南京都察院左僉都御史勅整江南北舊制舟

師未幾會工部缺右侍郎蒙恩簡命從人望也凡大舉措必竭兩端開誠商論共成國是兩奉璽書督修京倉落成汴徐河患告急勅兼左僉都御史總理修濟抵曹縣因已集人夫築長堤自大名至沛縣三百餘里又自滎澤抵永城縣疏通水道以防潰決是時游羅劉六劉七兵荒言官乞暫取回京 詔可之瀕行會計河南工費二千兩外山東存積并追完各處缺工之數共銀五萬兩有奇收庫作國正計不許擅支鎮守河南太監廖堂弟廖紀表裏逆瑾重以巡按御史張麟爲之心腹不遂侵漁深懷忿嫉後從巡撫

便宜發此銀築汴城外郭防禦流賊民恃無恐存遺
惠焉歸命於朝坐大學士梁公儲尚書李公鏐迎合
廖張意朋計下石先幾引疾詔許乘傳還鄉痊日有
司勸駕乾清宮災朝議起之不果高蹈一十餘年閉
門纂述有正學類編一十五卷四明文獻志十卷梓
行於時雜著董山遺稿若干藏之篋笥每曰吾自十
五至三十學爲仕也皆皮膚自三十至五十仕而學
也皆土苴四十乞身五十得請冀由史而經卽事求
道辨疑衍義以待後之人云

通議大夫工部左侍郎夏君昂墓志銘

李東陽

君姓夏氏諱昂字景德其先蘇州吳縣人國朝洪武初以間右徙實南京永樂間再徙京師占籍順天之宛平祖仲文考福敬皆贈通議大夫工部侍郎君舉成化丁酉京闈鄉試甲辰登進士第丙午被簡爲工科給事中弘治己酉選右給事中壬子遷禮科左給事中甲寅擢湖廣布政司右叅議久之始遷福建右叅政正德丙寅進陝西右布政使遷南京太僕寺卿己巳擢都察院右副都御史總督南京糧儲庚午

召入爲工部左侍郎甲戌十月十三日卒距其生正
統己巳二月二十三日年六十有六 朝廷遣官諭
祭賜葬君少精易學根據經傳文理邈達丘文莊公
爲祭酒試諸生屢寘首選梓其文以傳四方學者執
經問業前後百餘人分布中外有長臺憲列卿佐者
居官奉職爲給事時多所建白如議科舉條格論妖
僧左道皆切治體南屏潘先生時用文行聞天下累
薦弗用君言之最力乃擢官翰林遂入史局尤爲時
論所韙同考禮部會試得士爲多爲參政每至公邸
食簞服筭必露檢而後入爲布政諏訪民瘼動存儉

節在南京患馬政久弛務除姦慝知修倉兵多匿籍
密加勘覈汰冗卒千計以充營伍人以爲能在工部
每夙興治事督修京城及通州倉場不憚往返事皆
就緒以勞賜二品服嘗微疾上疏乞休優詔弗許資
望漸久南京卿佐莫先積歷竟不及大拜而君未始
一見辭色論者益以是驗君之賢君居家尤篤孝友
蚤失怙當母朱夫人喪三日不食葬祭用文公家禮
事寡嫂撫其孤祚若已出俾齒宦籍爲五官靈臺郎
接物謙巽至折輩行故人無疏戚邇遠皆稱長者如
出一口云

工部右侍郎張達傳

張達字時達江西泰和人天順八年進士授工部都水司主事調營繕司遷屯田司郎中擢應天府丞丁憂起復改南京鴻臚寺卿遷南京光祿寺卿弘治十三年九月擢今官至十八年六月卒賜祭葬如例達純樸不事表飾待人周密有禮平生罔有失色者居官勤慎守法鮮玷缺可議晚年言官有論其禮儀僣率者達方對客聞之笑曰我固僣率人言者之論諒哉其性度渾厚類如此

工部左侍郎崔公巖傳

胡直

崔公諱巖字民瞻先世本河南宜陽人祖顓任秦府
長史謫官郴州倉大使始占籍於郴公領成化庚子
鄉薦登辛丑進士甲辰授戶部主事監兌河西務軍
糧乙巳犒師大同丙午漕牧御廩芻峙皆有聲丁未
佐理大倉京儲出納惟允弘治戊申進員外郎督餉
良鄉保暨諸邊關已酉督徵於通州庚戌奉命儀真
諸處催督糧運事竣進郎中分割長蘆鹽課公既視
篆積弊爲之一清乙卯河決張秋糧運沮滯上勅
公往比至臨清河水已堅漕米弗克進者逾百萬石

公乃寄貯水次每石量收腳價銀并耗若干候來春分給直隸山東及河北先到船帶運於通州輸納而先期遣凍船歸不誤下運人皆便之丙辰有中貴人奏乞長蘆鹽二十萬引南京織造公曰利害三上疏得請遂已丁巳虜犯薊州密雲警報至兵出勅公與往區畫糧芻公百方措備大軍所至獲濟摺山東左叅政總部諸邊起運糧赴京車獲早竣未幾丁外艱壬戌服闋復原任奉命管屯田水利兼查驛遞支費衆務咸舉癸亥濰河決爲民患公躬率屬吏築濬三月堤成流還故道士民謳歌分守海右道備倭兵馬

簡練始精乙丑遷江西布政使尋遷河南左布政使理勞修墜皆著成績正德丙寅冬拜都察院右副都御史巡撫大同抵鎮疏論五事曰城邊防以遏虜騎立衛學以作將才增遞運以蘇民困免雜差以紓消乏均年勞以便巡守旣上卽見舉行四月破胡捷奏上大悅勅賜金幣獎勵是年以不附逆瑾逮詔獄久之始雪明年禦虜再捷改陝西巡撫以前功再領金幣之錫關中方荒歉餓殍盈道公查在庫見物委屬分賑仍具疏極陳上爲感動發內帑并補納例種鹽課銀十五萬備接濟之用軍民獲更生焉冬

召陞工部右侍郎署部事時羣璫爭興工役司禮監欲修經厰御用監欲修公廳內官監置造鼇山燈火屢疏極言事獲停止所省民財幾三十萬兩中貴用事人無所利入切齒怨怒坐是尚書缺次當及公而補公右者越公位廷議閼然公略不形辭色歲終山東守臣奏河決害甚宜命大臣往治羣小欲擠公外伴薦公明年公遂行沿流視堤且濬且築未嘗少安寢食工將訖內艱訃至得代歸因而中傷幸上聖明止得致仕公退林下惟詩酒自娛人不敢干以私建蘇仙石橋以濟病涉民至今稱之家居歲周紀嘉

靖元年四月辛其子士英請于朝 詔有司治葬遣
官諭祭

工部侍郎何天衢傳

廖道南

何天衢字道亨世居營道之瀟川人稱爲瀟山公本漢大司空何武之裔至唐有曰保義者通判道州保義之子仲舉爲馬殷天策府學士數十葉至天衢天衢生而顯靈淵篤識者異之比長遊濂溪月岩山崎嶇截業輪囷嶒嶸西東下上朧胸側匿宛如太極圖狀遂溘爾深悟宵爾冥思學爲先天之學久之有得人莫能窺弘治丙辰進士授嘉興令縣多豪右天衢至日誅悖逆戒器訟治圯族恤輓厖綏逋從六載績用丕彰拜監察御史彈劾無少避大司馬馬文昇時

司宰衡天衢首効之權貴斂手畏憚嘉靖紀元擢爲
都御史巡視河道時河南諸侯王多驕縱不法于澤
于淡蓄妖招亡馳騁無忌天衢暴諸姦狀剪其羽翼
藩服帖然鎮寇王堂兵起魯沛勢連淮潁衆十數萬
天衢克之晉工部右侍郎增祿一品留守南都直日
食門災上疏極諫上嘉納之乃遷理易州廠廠多
中貴人恃恩斂怨處之咸宜未幾人工部大役朋興
綜理微密事克就緒丁亥春正月庚辰大霧雨水水
壬午亦如之天衢素精於星象曆數皇極太乙之學
舊與浙隱者甘泉吳琬遊盡得其術至是徵諸咎徵

竊嘆曰京房有言湧泉出道人已今木稼吾其已乎
乃進予謂曰老夫已矣無能爲矣視楚先民心孔悲
矣知老夫者其惟吾子乎二月丙辰卒于旅邸子啓
始生四歲乃蔭其弟曰天行

工部右侍郎徐公讚墓志銘

張邦奇

公姓徐氏諱讚字朝儀年十六遭父喪太淑人程氏
憂之公日益淬勵奉慈訓勤苦績學服闋補縣學生
從父少叅公沂受尚書母舅憲副程公瑞卿時左右
之學用大成弘治辛酉舉于鄉乙丑登進士時修
孝廟實錄命公採輯于南畿丁卯復命授棗強知縣
流賊劉六等長驅棗強宿戒預備逡巡避去已而大
饑公捐俸爲粥立法分餉富民感激出粟相繼全活
萬餘庚午擢監察御史奉例免試職以優異之比之
京士民泣送填道旣復相與立祠祀之明年巡視京

城鋤擊豪右明年巡鹽長蘆兼巡視河道時劉賊遺黨楊虎等流劫開濟熾甚公計擒之械送京師武廟嘉悅賜之金幣甲戌巡按江西時宸濠蓄逆潛結湖中巨寇徐九齡等數百人公悉擒剪其羽翼疏聞賜璽書獎勵陞俸一級九江諸郡洊罹兵荒民困特甚疏請寬逋負罷徵役釋冤平獄風采凜然丙子擢蘇州府知府抑奢麗剔弊蠹課財惠民百務釐舉嘗橫被誣抑恬不爲動人以爲難丁丑入覲吏部考最比還郡大水疏請賑貸民以不死已卯宸濠煽變公治兵給餉遣戰艦數百應援會大駕南征遠近震

騷獨蘇郡賴公不擾辛巳 天子踐祚擢河南布政
司右叅 仍掌府事白茆港之役撫臣李公充嗣薦
公自代不允遂以安公費省而功巨公之力也 上
特降旨嘉勞嘉靖壬午擢江西布政司左叅政甲申
擢貴州按察使尋改湖廣丙戌改雲南丁亥冬土舍
安銓叛調兵裒糧登城徇師至廢舍寢造小旗千餘
書同心協力各保身家八字令各執聚聽撫以陰誘
其脅從之黨賊勢遂衰時沍寒民多凍餒公請撫臣
大發倉廩全活無算戊子春土舍安鳳朝文繼叛與
安全合進圍省城將肆焚戮上下震恐公登埤呼寇

論以 朝廷威德皆伏地曰不敢有他但欲平爭襲耳公權辭許之令退舍俟命寇旣退卽走使各哨集諸軍合擊俘獲萬餘計擒渠魁審簡脅從卒爲開釋民德之家爲立祠巡撫歐陽公重疏公勲能擢本藩右布政使公念太淑人壽躋八十疏乞終養卽日棄官東還撫按交章保留陞都察院右副都御史撫治鄖陽璽書及門公猶欲辭太淑人以大義勗之乃行尋改撫河南值歲饑盜起條陳救荒三事一曰寬賦斂以安人心二曰廣賑卹以救民命三曰嚴備禦以慎強梁 上納焉又陳四事一曰處歲派以資國用

二曰均地糧以蘇民困三曰移水次以便兌運四曰
處馬政以節民力庚寅夏懷慶麥秀四岐以間上
嘉悅溫旨褒答賚以金幣辛卯郊祀禮成推恩進階
通議大夫贈祖考皆如其官夏旱疏請蠲租公在洛
中救荒卹災先後疏百上洛土賴之所論薦皆一時
名士士論稱服陞工部右侍郎壬辰春承勅勘事山
西事竣聞太淑人訃音哀毀幾絕上賜祭葬如制
公耆年居喪慟必移時積以成疾癸巳二月遂卒
上聞賜祭葬公方面美髯偉然山立望之知其德福
人也遇人冲夷和粹不喜譖諂恒持敬畏不少忽平

生所矜恤甚多未嘗自德有犯未嘗與較人無賢不肖稱公雅量無間言善爲文多不留稿今所存奏議八卷藏于家

工部右侍郎贈尚書瑞石江公曉神道碑銘

呂 本

江氏出自伯益季子玄仲封於江因以爲姓其後族屬繁衍散處海內至宋有某者自汴扈蹕南渡遂家于杭之仁和入 國朝累世貴盛始大著公諱曉字景熙別號瑞石曾祖諱通封徵仕郎禮科給事中曾祖妣陳氏贈孺人祖諱玘景泰辛未進士由禮科給事中歷官山東布政司右叅政累贈通議大夫工部右侍郎祖妣陸氏封太淑人加贈淑人考諱瀾成化戊戌進士由翰林編修學士歷官南京禮部尚書贈

太子少保謚文昭加贈資德大夫妣王氏封太夫人
加贈夫人成化壬寅生公自幼德器純粹穎悟絕倫
弘治辛酉甫弱冠中浙江鄉試第十人明年卒業北
雍謝文肅公爲大司成深見器重每較藝輒居首公
經學既精而又博綜羣籍正德戊辰中會試第四人
主考王文恪公梁文康公一見稱之曰兩腳書厨也
廷試二甲第六人諸老謂宜在詞林公以文昭公在
南京乞便定省授南京兵部武庫司主事己巳丁文
昭公憂歸辛未復除兵部武選司主事武選事例浩
繁吏得因緣爲奸公編定條例又查天下衛所貼黃

以各官品秩姓氏功次略節類寫總冊凡襲替卽按冊處之弊盡革嘗勘剿殺流賊功權勢人無一得冒者癸酉春遇恩例授勅命進階承德郎乙亥考滿陞職方司員外郎分蒞前司專理解發軍伍則審遺必速而收補有限仍刊條格人給一紙以祛宿弊時稱便焉大司馬王恭襄公甚重公適達賊入白洋口運謀防禦賴公居多虜退賜彩幣一襲丁丑陞車駕司署郎中尋以考滿實授武舉充收掌試卷官時武廟巡幸傳旨起關無間晝夜公日宿於公凡違例者率不與仍定例則題允太僕議處馬政事宜公爲

條奏俱著爲令是冬奏乞歸省己卯北上調吏部稽
勲司郎中尋以考滿進階奉政大夫庚辰會試充同
考試官部中同僚多飭威儀而公坦夷率性惟持正
秉公留心人才臧否每冢宰咨及必直言又有候選
百餘人言稱稽勲公而恕考功私而刻者冢宰深然
之由是爲同僚所忌嘉靖癸未考功轉文選郎中遂
出公爲山東布政司右叅政士論甚不平公欣然赴
任惟以盡職爲念乃嚴檢劄立條格勤比較凡可以
剗吏弊而蠲民瘼者無所不至每出行部卷笥必露
檢而後入自傳食之外一介不受先是蒲祿多偏給

貧者苦之公議按季均支歲歉議奏免民租仍加賑濟又嚴之侵匿錢穀數十萬故糧不愆期而民不告勞及督運至京懲前攬納之弊乃議召商上納隨時估值積出附餘輸官至今爲法撫臺王公特疏薦公賜彩幣羊酒丁亥陞山西布政司右布政使署篆者久之公見百務廢弛公私俱病用是建議如平法則以革羨餘公支給以杜請託照戶則以均徵派覈歲支以足經費處鹽課以紓國計速報災以議除豁等事撫臺常公道素重公卽次第施行之上一時改觀戊子歲大侵太原平陽民多轉徙公極力安輯賑

濟全活者以萬計公時寅出戍歸剴裁繁錯累年勘
合計日完報巡臺穆公喜曰如此幹理山西安有廢
事乎各司事皆屬公稽覈是冬入覲公於合屬賢否
鑒別素精酌定考語無一枉漏吏部考察悉如所擬
時公聲望益隆然孤介自守頗不悅於當道久而不
遷庚寅春歷三年乃陞應天府府尹凡道經屬邑民
必焚香頌恩德比至應天勵精如前而法制加備申
防禁減宴會清案牘勤猷訊課農桑平收支革羨餘
省浮費雖處高位治帝鄉卽在外省不是過也復條
陳職掌十事一革庶人婚喪需索一革庶人私用物

件一革工部冒役匠役仍當民差一革各坊冒籍內
官家人派捕絕戶一查內府擡運扛夫驗扛差撥一
查內府土工人戶量減編僉一查巾帽局洗櫥夫通
行禁革一查鮓魚廠供應夫革免科派一查析薪司
運柴夫革免部總一查巾帽小下程盡行減革俱允
行撫臺毛公思義以公積貯有法 上聞奉 溫旨
有體國爲民之衷歲辛卯鄉試爲提調官公凡三領
提調每因舊法出新意區畫防範極爲周密試錄所
刊文義多出公手筆士林至今傳誦焉是冬再入覲
尋以太夫人憂歸甲午復除應天府尹乙未春值旱

災竭誠祈禱雨澤隨降又督民捕蝗蝗盡滅是春頗
收至秋復旱乃發長平倉暨屬邑預備倉穀數萬石
行賑全活亦數十萬人初公之在郎署也縉紳皆以
清望重公及歷藩輔乃精練民事動爲百千年規誠
可以利當時澤後世公既屢經薦剡始受簡知丙申
夏陞工部右侍郎蒙恩廕子圻入胄監時大工方興
公奉勅督理帑藏常不給部議加派各省公曰濫費
孰若節用之爲寬民也今夫匠冗食而物價低昂不
同徒爲勢要奸商之資耳乃諭司屬簡其人平其價
量工稱餼盡裁內監所估且防檢嚴肅凡京師富室

名攬頭者無敢至門雖多循衆情而國用不耗是年
皇史成完賜金幣及 御製記 廟工完陞俸二級
賜金幣有加丁酉二月重給誥命祖父皆加贈陞級
舊制祖父官高於子及品級同者不得加贈其已受
誥命者不再給此蓋殊恩也戊戌慈寧宮完加廕一
子入監奉先殿完加二品服色其他慶賀扈從錫賚
駢蕃無算人始知公爲 上所嚮用云己亥正月
上將巡承天命內官監沿途搭蓋行宮既有旨令公
先往巡視督理時公已具疏同尚書蔣公璠極陳南
還所繫之重欲留駕不得乃陞辭出京比有欽改駐

詳程次增寫慶都新樂栢鄉磁州湯陰五處禮部尚
未刊行公弟曜在祠部令吏馳報公隨照新定程次
行巡撫都御史陸釗巡按御史胡守中作速營辦以
須駐蹕已則兼程先詣諸州縣督有司晝夜促治事
皆有緒而守中弗知也恐緩不及事先圖委罪于公
乃叅稱捏咨稽誤等語中批回話公行至南陽始接
本部咨奉本抄呈與欽定程次同至公始知守中之
誣及認罪疏上遂下詔獄鎮撫孫綱與守中素善略
不爲辯照原叅覆奏送刑部問擬還職奉旨爲民公
念家屬復間道之京沿途士民相訝曰是前日巡視

公也爭具肩輿送之蓋公奉命而南也恐扈駕者衆
有司供億不支自備乾候所過止受廩米三升故民
感激若此公旣歸角巾野服日以書史自適闔門省
愆而已凡過訪者就於家庭再拜答之未嘗往謝辛
丑冬胡守中孫綱各以罪棄市士林稱快自公被誣
言官雖忿忿不平然守中在位未敢顯言薦之至是
撫巡皆累疏薦揚大抵謂其德學才望忠誠節操真
足以繫 朝廷之重輕所宜亟用乙巳七月奉 詔
復冠帶戊申吏部以公等八人起用雖未奉俞旨而
朝議翕然以爲善類彙征矣是後薦公無虛歲亦不

果用癸丑感疾卒年七十有二嗚呼傷哉公卒十三年穆宗卽位用臺諫言贈公尚書祭葬悉如制公束髮登朝敷歷中外所至功見言信而文學政事歸然爲士林所推人人能知之若夫至性孝友事父母生養沒哀情逾於禮兄暘弟暉卒無嗣俱爲悉力襄事撫教其繼子與祠部弟友愛特至以其子延承已廢白首怡怡養寡妹并甥女于家不念同年舊惡而由免其子監生之罪至事干公門則絕口不談不經營生計不增置屋室儉素無異寒士藩臬欲毀寺爲文昭公建導祠力辭之聲色貨利一毫不染惟玩索

經籍考覽本朝文獻鄉郡沿革與夫裨官野史地里
醫方罔不旁搜以此自老所著有瑞石稿十卷歸田
錄十卷春秋補傳十五卷傳於家

嘉議大夫工部右侍郎雙橋蔣公淦墓志銘

孫承恩

嘉靖辛丑五月二十六日少司空雙橋蔣公以疾卒於都城之寓先是公由浙藩布政使擢順天府尹順天徃役久弗平其他弊政尤多公悉意咨訪特疏上四事曰議編審以均州縣曰議優免以恤凋憊曰議偏累以阜邦畿曰議修理以省民力上嘉納以次舉行時譽振起甫七閱月有工部之命繼紳士方傾注冀公有爲而公雅有消渴疾以積勞復作是時沙河城慈慶宮役竣有白金文綺之賜加俸一級乃

庚子春病轉劇三上疏乞休始得允瀕行遂以不起
公諱淦字汝潔雙橋其別號也廣西全州人父某以
鄉舉授直隸池州府建德令丁母憂去遂不仕後因
公官布政使偕祖俱贈如公官祖妣陶氏母伍氏俱
贈太夫人公幼穎悟不凡弱冠務學才思溢發丁卯
領經魁鄉薦辛未登進士授兵部車駕司主事卽以
清苦自持兩闕馬於宣府太同居庸紫荆二關乙亥
秋調武選司主事丁丑秋丁外艱先是公官京師不
獲時接建德君手書輒憂念旣而例得歸省九閱月
建德君故哀毀踰節閉門讀禮足不及公府庚辰起

復仍舊職甲申憂陞武庫司員外郎未幾陞武選司
郎中主選二次人服其公是歲冬補浙江嚴州府知
府興利革奸四境靖肅吏無招權民知向方政暇則
進子弟員於庭與辨論經義歲課有不合者親與改
削今嚴士猶寶藏其筆迹巡訪使交薦之郡人刻石
記政丁亥春遭母憂哀毀致疾久始愈服闋復除廣
東惠州府知府政績視嚴誌郡者載公名宦癸巳冬
陞河南左叅政值歲侵公議策賑救巡撫簡公甚嘉
納之督運如京自公應毫髮無私焉洛中今傳爲口
碑丙申陞廣東按察使巡按陳侍御稱其心行光明

憲度整靜辨冤獄懲貪暴三四事猶彰著人耳目戊戌春陞江西右布政使時聖母梓宮南柩公以一身接應江州不動聲色民不擾而事集甫一月擢浙江云公平生慎操執每諭子弟曰他日決不敢挾重貨以過柳浦故食無兼味衣無重帛世利紛華淡如也循循如書生無疾言遽色與人交若恐不得當其意斷獄務平恕不以得情爲喜生平未嘗事請求中朝貴人無分毫外慕故末年又號易居子云尤厚宗黨朋郵匱乏擇質美者教育之俾之有成有名棧名貴者俱領鄉薦好善垂老不倦嘗聯諸成語以自警

曰爲善最樂寡過未能又曰皆反求諸已不敢惡於人若公者可謂篤行君子矣公生於成化丁未十二月八日距卒得年五十有五初配唐氏繼配舒氏俱贈夫人又李氏皆先公卒又繼配吳氏子一名梲舒氏出女一適鄧壽箕側配張氏出公卒梲將扶櫬歸葬於里之原欲文其墓中之石謂予公同年具狀來謁不得辭也銘曰輻車敦敦僕夫在門公喪曷歸萬里于南維公閭閻行峻貌溫敷歷內外厥聲振振亦旣顯庸而用弗究胡豐其德而裔其壽刻辭埋壙貽後弗朽

工部右侍郎贈本部尚書陸公杰墓志銘

康大和

公諱杰字元望別號石涇自少穎敏不羣年十七補
邑庠生領癸酉鄉薦明年登進士授兵部武選司主
事甚爲尚書晉溪王公所器重轉車駕員外郎武庫
郎中聲華已嶄嶄然起矣癸未陞湖廣右叅議分守
荆南地當河陝二省之衝客戶雜居豪猾難制且與
宦者共事公悉以詔書從事確不可撓丁光祿公憂
服除改山東分守遼東遼東與虜接壤公時與總戎
諸公出獵講武練兵經略有備邊境以寧庚寅陞陝

西按察司副使時久旱乏食公開倉賑饑又增價以
糴商販畢集民獲更生虜寇榆林羽書告急上命
趙總兵將京營軍往援至則屯綏德不進公親率梁
遊擊張總兵合兵出戰斬獲甚多虜引去乃奏撤趙
總兵軍有急願以身當之居數歲虜不敢犯邊降者
日衆總制唐漁石公嘆曰陸兵憲忠智任事謂今之
寇萊公非耶癸巳遷右叅政分守秦鳳涇原寧隴地
皆邊陲要害兵民雜處難治且藩府祿糧積連累歲
公至當兵荒之餘整齊諸屬振盪剔蠹區畫有方人
就法矩藩封亦不敢肆總制唐公巡撫王公交薦其

才甲午擢江西按察使公宴畢卽行獄見重囚多脫械曰往者越獄之變非坐此耶重責守者而獄禁始嚴轉右布政使尋遷廣東左布政使五領以南擅番舶之利公懲犯禁數十人民始斂輯安南貢使不至朝議以都御史毛公督師征討公豫偵安南陰事爲毛公密言可不煩兵而服毛公以聞上許便宜罷兵未幾莫登庸上表請罪補貢如其言戊戌擢都察院右副都御史巡撫湖廣恭遇今上巡幸供億浩繁公處分若素定一日旨下數次俱酬應無失駕入河南界公預令除道人各取粟稍數束執以待駕

未出河南燭盡御仗行昏黑中比入湖廣界衆炬如

畫 上甚喜蓋自是已識公矣隨奉 章聖皇太后

梓宮南柩水陸供輸莫不祇備時山陵工殷乃奏留

上供歲額若干以備工費又慮楚民重困請蠲賦一

年 上皆從之楚人懽若更生修復江漢長隄二千

餘里各設隄長以守至今賴之辛丑進工部右侍郎

仍兼副都御史撫其地及奉勅督理祓恩殿諸工畢

乃還京辭免所兼官適丁太淑人憂人有挾收嗾言

者論公得致仕去居久之 上念公不置每有除拜

必問陸杰安在或對不知及巡按御史王君應鍾疏

薦公 上驚曰陸杰固無恙乎會修顯陵太和宮觀
皆公所營者乃以原職起公蓋 上自南巡以來
意大用公常於湖廣陛見見公偉貌美鬚髯進退從
容語近侍曰陸都堂真大臣也及晉侍郎屢有白金
文綺之賜御札諭問稱曰冬曹大臣而不名又欲擢
公爲兵部尚書未果公感激就道冒暑過勞忽患痰
疾越歲疾漸加卒于官訃聞 上震悼遣官諭祭命
有司營兆域贈工部尚書其始終恩遇如此公負氣
剛直侃侃不阿自爲正郎時 武廟南巡公與黃鞏
陸震伏闕極諫 上怒廷杖四十幾絕而甦自是直
獻徵錄

聲已著在太和山有歲例銀舊爲閹宦漁奪公盡籍
付有司宦者爲之斂手江右有詹某者以勢宦姻親
常戴大帽肆爲誅求監司不敢問一日謁公公卽收
之獄同官愕然公曰此輩不治恐爲大帽者接踵也
湖廣守備廖斌貪橫虐民公按其事奏之斌亦誣奏
公以激怒賴天子明聖卒不加罪未幾斌亦抵法
其奢褻風節類如此卒之日年六十有七其先吳郡
人唐宰相忠宣公之後至宋有樞密使旌吉者子孫
爲鹽官乃遷廣陳繼又遷石牌涇今爲平湖人高祖
諱秀曾祖諱宗皆好義樂施以尚義旌其門祖銀授

程鄉知縣去而見思民設木主祿焉父淞官至南京
光祿寺卿 武廟時曾諍藩國請乞及倭貢忤權宦
禍幾不測以直道稱於時母王氏累封太淑人公孝
文備至事光祿公一言一札奉以周旋嘗爲請謚下
禮部未上爲終身未畢之志待諸弟有恩輯家譜立
義田建世德祠敦叙堂養蒙室與族人共之賙貧戒
慝恩義兼至入仕四十年歷五省十三任皆積勞序
遷不爲巧宦而所至有聲爲文明潔道峻凡文檄奏
疏人不能易云

通議大夫工部左侍郎贈都察院右都御史

公輝墓志銘

呂本

公姓龔諱輝字實卿號笑齋晉大夫堅之後渤海守
遂諫議大夫勝太常武顯於漢有國淵者官於越愛
雲門山水因家焉至唐侍御史俊避黃巢亂隱居小
岐之上卽今龔村再徙石潭有功德於民廟祀不絕
實爲公始祖凡若干傳生公祖璋欽德弗輝考森任
宿遷丞致仕督府就其家徵用已復歸號見一皆以
公貴贈通議大夫工部左侍郎祖妣沈氏妣方氏俱
贈淑人公生而岐嶷穎異過人牛角卽究心經史至

忘寢食補邑庠弟子員每試輒居首以詩領正德丙子鄉薦第二登嘉靖癸未進士尋丁內艱服闋授工部都水司主事丁亥命董漸直江西竹木事竣北上復以營仁壽宮先蠶壇殿勅公督大木於四川及貴州西路貴西路山不產木檄下赤永二衛以狀白公公單輿親詣其地果如狀遂具疏請停免得旨允其奏於是公往四川得大木五千餘根板枋如之而部劄欲再倍其數公私俱困民情洶洶適慧星見詔求直言公遂上蘇民困以弭天變疏其略謂四川僻處一隅而巨木多在深山窮谷採取必弔崖懸橋而出

繪
本圖

況連年兵荒相仍民窮財盡殊可憂也竊計郊壇蠶
室漸次落成仁壽一宮亦當無幾解過木植似足應
用仍繪山川險惡轉運艱苦萬狀一十五圖各爲貼
說具奏人咸爲公危幸荷先帝聖明卽命停止蜀
民如脫焚溺相攜持頂禮號泣隨公車比出境未幾
吏部覈公資俸奉旨陞二級留京用爲同使者援例
以請竟註公福建按察司副使隨丁外艱服闋以副
使提督陝西學校公以關中士習有奇氣文章學西
漢語而於義理精微或鮮窮究乃日進博士弟子員
相與切劘身心之學一時多深造之士隨陞本省參

政勅理黃冊巡按浦公檄公爲全陝政要一書軍民
利病畢載尤詳於制虜折衝之具二十二年陞廣西
按察司旋轉廣西右布政使以征蠻勞勩與有銀幣
之賜二十六年轉湖廣左布政使未幾擢都察院右
副都御史提督南贛軍務甫至旁邑同安盜發猖獗
公嚴督所屬并隣境協力夾攻賊隨授首論者以公
運籌收功之速不知同安非公屬也繼而懸繩掛坑
苦竹大山白葉洞三巨寇劉廷選蕭鐵古陳榮玉等
各恃險負固劫掠三省而懸繩尤甚知縣施憲爲下
所誤反寄爪牙賊中恣其搏噬以逞公乃行十家保

甲法如故事然陰檄漳南嶺北諸道或分布犄角以
備聲援或設伏間道以防奔逸部勒所司各率精銳
三路並進後遍揭曉諭使相捕自贖而攜其心一夜
兵忽至門遂平懸繩之巢其他二巢漸次勦滅例當
以捷聞得廕叙公以議處地方事宜具題僅奉旨陞
俸一級賜銀五十兩紵絲四表裏仍順輿情爲善後
之策措置毫髮不擾於民民大悅相率立祠祀公名
報功祠二十七年勅總督漕運兼巡撫鳳陽等處時
河流忽東南注淮市廛幾大決議者以爲必上聞公
曰民危在旦夕而循故事待報此於避形迹爲善非

任事之體亟下令就決所築堤實土于破舟沉之旋
壓以石水勢亦漸緩凡若干月費若干而堤成闊若
千丈淮人賴之立碑於鎮河下以紀功德其他去債
帥節浮費疏泉源均勞逸凡有益於地方者無所不
至二十九年四月陞大理寺卿六月陞工部右侍郎
九月轉左侍郎會虜初去奉勅督修太倉復兼築外
城及戰車兵仗費省功倍至今人稱之是年十月始
考滿獲請封廕後以銜公者欲中公無他可指摘竟
改公留都公之南也人皆以爲吏隱可坐糜廩祿循
轉華堦公淡於宦情已久遂決意乞休奉旨准致仕

公卽日戒行乃遵宿遷公遺意改號見二士大夫設
祖都門外傾城出送作完名篇以美之公性和悅甚
宛若笑然故就而見者相與稱公爲笑齋公曰是善
名我因爲號比其當官屹然法守不可奪大利大害
視義所在不少避就尤篤於孝友平居懷慕父母老
而不衰四時祭享未嘗不潸潸淚墮痛弟早亡撫諸
孤一如已出悉以祖遺田宅畀之且加益焉公族繁
盛著宗約一篇其敎在遵行孝弟更相敬讓爲本各
隨資性習士農爲業以及鄉之人共舉行之遂成仁
里自筮仕來奉勅八道遍歷九州所在立祠報德公

每以盈滿爲懼未嘗治垣屋市田園菲食惡衣不異
寒士惟以教子課孫爲事與少司寇東橋楊公輩爲
可常會賦詩奕棋竟日而罷每月人一舉之詩文皆
溫雅簡切若干卷藏于家西槎疏草二卷其疏若圖
宋入經濟錄全陝政要二卷皆行於世

工部左侍郎郭公鑒墓志銘

裴 宇

一泉郭公晉之高平人也諱鑒字允重別號一泉本
唐汾陽之裔始祖憇遷居高平傳六世至欽封監察
御史而高平之族浸著欽生質正統甲子鄉薦任光
州守有異政質生定成化乙未進士同知邳鄭州事
定生坤弘治乙酉鄉貢令藍田守霸州所至以威除
害民咸德之以公貴贈通議大夫工部右侍郎卽公
考也母王氏封太宜人贈淑人以弘治戊午孟冬八
日生公公生而穎慧俊逸少負大志從父宦陝右從
李侍御東學輒博通經史時出奇思深爲李所器重

正德己卯甫弱冠以春秋魁三晉問學燁然動士林
嘉靖壬辰復以春秋魁天下文出四方士爭傳誦之
授行人奉使韓府動循規制乙未選工科給事中歷
禮科刑科左右給事中己亥陞戶科都給事中悉心
効忠累疏建白不苟不激切中時艱常遶簡扈聖
母梓宮葬顯陵都御史怠緩卽論劾罷之復命上
嘉賞賜內鑾錦綺無何工部尚書有請張者抗疏論
其卑人咸爲公懼公恬不自憚已得俞旨落尚書職
公念天下戶口徒存版籍殊耗實數欲重邦本行攢
迫法章入上是其言行之公語人曰言官貴識大

體糾官邪先急要可也若恣已意摘人細隱煩更張
吾弗爲矣用是朝端推服一時公議歸之壬寅陟太
常少卿提督四夷館館舍久圯捐俸葺之創刊館則
豎題名石率教師訓譯生勤習藝業法令大行會丁
母憂陳情蒙諭祭以文遣方岳祭於里廬戊申制闕
復任四品三載考績已酉擢南光祿卿尋轉京兆尹
時胡虜犯近郊都城戒嚴公下令堅壁清野慎加防
禦畿輔以安庚戌進南大廷尉明年召還棘寺明飭
法律雖忤權璫弗顧壬子陞工部右侍郎奉勅總理
蘆溝橋玄雷殿寶源局鑄嘉靖通寶諸工荷欽賞羊

酒金幣是歲以三品考最進階通議大夫贈恩三世
廕家嗣入大學甲寅轉左侍郎督修京師外城籌畫
先勞務圖堅久而材力一無靡費工竣加尚書俸丙
辰奉旨致仕邑志缺有司請纂修則加意攷正二三
閱月志成爲闡于南郭與親黨賢士大夫遊詠爲文
雄健精暢深得左氏體詩有唐韋劉超曠之趣著作
多散見有一泉稿藏於家年六十有六

工部右侍郎少村黃公廷用墓誌銘

呂本

嘉靖乙未春會試予備員同考得少村黃公廷用閩中士夫有爲予言者曰少村莆名士也十歲能屬文弱冠舉于鄉侗儻瓌奇有大志他日當以文章顯天下請爲公得人賀次日少村來見余立談間意氣不凡果如閩士夫言余亦欣然白慶爲得人是年世宗御文華殿親灑宸翰試進士一一去取出聖裁改庶吉士若干人而君與焉君感激殊遇益自奮礪通讀中秘書每館閣之試輒在峻等三年以才授翰

林檢討辛丑會試同考試官甲辰爲廷試掌卷官丁未爲廷試受卷官己酉爲應天鄉試考試官庚戌爲會試同考試官所至公明能舉其職乙巳擢之修撰辛亥擢司經局洗馬兼翰林侍講皆久次而後轉知者方以爲非所以待異才乃黃給事中論之調南京兵部員外郎未任甲寅陶御史又論之調衡州府通判旣而當道者惜君之去爲無罪稍遷太僕丞以姪孫懋官爲卿改尚寶司丞是冬陞本司少卿丁巳陞南京太僕寺少卿戊午陞本寺卿己未陞光祿寺卿君年資日深去清華而就繁劇非其好也而君顧能

安之適光祿供應告乏君加意節省查出老倉米四萬餘石減去柴炭銀三萬餘兩頓紓一時之急前後僚屬皆以爲莫及也夙夜勤勞於職凡十八月庚申擢工部右侍郎李給事中又論之君曰出處命也功名外物安能囂囂與人較曲直留戀爲哉吾自茲長往矣遂投劾奉旨閑住去還莆未幾而倭賊圍城幸叅將戚公領兵勦逐之君具酒果厚幣交迎以謝戚君又募勇敢捐二百金納之公帑爲巨室倡忽新賊繼至戚君已移他都當事者墮於賊計城陷君被賊執居賊中五閱月艱苦萬狀自以爲必死矣賊知君

大臣又見慷慨歌笑自若不敢犯竟得脫歸乃寓書於余曰仕之不達阻於人言今不免盜賊之手將何尤哉乃知死生有命富貴在天自茲得以餘生待盡首丘至願已畢更號四素居士又許買舟訪余於稽山鏡水之間不意丙寅十月初十日一疾竟不起距生弘治庚申年六十有七耳君平生曾次磊落其意相合者輒傾倒底裏握手相歡如乖其志好則辭色不少假借君嘗語余曰陸東湖朱葵亭朱簑菴李古冲康礪峰林省泉郭東野尹洞山李石麓言朋友之厚者無以過之董近淮丁后溪邢雉山宋仲石黃某

董某周某言門生之厚者無以過之君往來非諸公
不密心事非諸公不談高興非諸公不發人見君之
交盡富貴也不知諸公者皆 朝廷勲舊海內英豪
得一足倚爲重況若是之多耶古人觀人多於其所
與顧以此議之謬矣君諱廷用字汝行號少村世爲
莆田人唐御史滔之後宋狀元公度十二世孫公度
文集君刻於衡州

工部左侍郎劉伯躍傳

實錄

嘉靖四十一年九月詔工部左侍郎劉伯躍南京刑部右侍郎何遷南京通政使司右通政胡汝霖南京光祿寺少卿白啓常原任湖廣巡撫都御史張雨廣西按察司副使袁應樞右春坊右諭德唐汝楫南京太常寺卿管國子監祭酒事王材俱革職閑住伯躍女適大學士嚴嵩之甥應樞遷躁進好名色取仁而行違其撫江右時厚斂以遺嵩父子欲致崇禋汝霖雨貪肆不檢啓常匿喪遷光祿爲嵩子世蕃狎客至以粉墨塗面供其驩笑汝楫先任吏部尚書唐龍之

子以父事嵩因得及第嵩亦兒子畜之與材俱出入
臥內交通請託至是嵩敗伯躍等爲刑科給事中趙
灼所劾兩爲吏科給事中沈淳所劾汝楫材爲刑科
給事中陳瓚所劾同時罷去初嵩專政日久耄而智
昏又日夕奉 上玄修卒卒無暇盡委機要於子世
蕃世蕃狡黠有機智頗記識往牒是時四方多故凡
遇疑難事世蕃卽援據已事參綜陳說嵩以爲才每
諸司以事關白請裁嵩必曰與小兒議之世蕃故兒
侈無賴旣竊國柄遂明日張膽大啓賄門凡中外文
武吏無論大小遷授上下一視賂入爲軒輊一時狡

佞無行之士若趙文華鄒懋卿萬案董份及汝楫輩
咸朋黨交通爲之關節因而各張騙局于外諸債帥
墨吏羣然趨之擇官選地取如探囊朝求暮獲捷若
應響文華懋卿嘗一奉使撫按以下咸望塵拜於道
左供費腴膏血饋遺竭帑藏遂使紀綱陵夷廉恥掃
地邊備懈弛閭閻困敝夷虜交侵盜賊蠭起則嵩縱
子爲非任用羣小之故也賴上明聖一旦拔去巨
奸如大明當空陰沴屏伏向時假借氣勢鼓煽聲利
之徒咸翻翻去位朝著爲之一清焉若懋卿之幹局
份之文學汝楫之門第使其持身克慎恬靜自守皆

可以坐致通顯乃不自愛重甘心爲市井奴隸之行
卒之身名俱辱爲世所羞稱後來者可以鑒矣

工部右侍郎張玘傳

實錄

工部右侍郎張玘山西石州人嘉靖十四年進士初授大名府清豐知縣陞兵部主事歷郎中知府按察使陞都察院右僉都御史巡撫順天尋謫布政叅議陞大理寺左右少卿順天府尹南京戶部右侍郎改今官玘孝友樂易其居官所至以廉稱嘉靖四十四年十月卒賜祭葬如例

嘉議大夫工部左侍郎贈都察院右都御史沈
公節甫神道碑

曾朝節

萬曆辛丑冬仲五日左司空鏡宇沈公卒于家踰月
訃至京師其仲子淮予辛卯所舉士也方檢討翰林
哭籲于朝援典若例以請 上爲震悼予祭予葬視
三品之全予贈秩內臺二品其易名之典下所司具
數以聞於是爲紳學士大夫旣各吊問于其舍皆相
與咨嗟喟愾以司空公名行之純 上恩禮之厚皆
不可易得惟是老成衰謝不能不興國家典刑之感
而先是一二銓總主議者方急推擇河漕重臣議未

上頓足曰又失一人矣予與大宗伯臨胸馮公少牢
高安敖公言予三人分更深曷相與誄之誄旣檢討
淮稽顙哭謝已又拜哭乞所爲志若表若碑者予三
人相視而嘆遂各任其一以去無何敖公馮公相繼
卒于位獨予以病逡巡乞骸骨未遂乃歲癸卯三子
皆有書來膳部演兼以司空公行略徵往諾則獨予
羸然在爾未有以任筆札嗟乎典刑益稀而人壽難
期吾不可以沒吾三人者之志也又越月而其姻家
錢光祿之狀出遂懷括次第之公姓沈氏諱節甫初
名之歷以字行更字以安鏡字其號也沈自東晉望

于吳入本朝自塢和公始孝弟力田世其家四傳存
介公有文其仲子孝清公贈徐州丞生樂愚公樂愚
生空庵公汝梁公曾大父也大父曰兩川公端舉孝
廉贈縣令父曰吳洲公塾封南尚寶卿母曰贈宜人
閔氏公自兒時疑如成人兩川公曰必亢吾宗稍長
授春秋十五補博士弟子爲古和雷公方山薛公所
賞識二十與廩又六年舉于鄉明年成進士出馬文
莊林文端之門兩公端重慎許可咸深器公于時分
宜在事鄉要人有欲援公中秘授指嘗公公不應已
而曰客固非知我者壬戌授禮部儀制司主事曹務

簡公閉戶讀書考覽本朝故實與同舍郎陸莊簡太
宰曾見臺司空友善以道德勛業相砥礪二年陞祠
祭司署員外郎事滿考陞本司郎中公旣以清執著
聲又數練閱曹有疑禮咸取衷焉主部務者嚴文靖
李文定高文端先後深倚注最後當新鄭高公雖亦
名相引重顧時自貴倨會以事詰責兩主政甚厲公
曰上下之交有禮何至是輒令掾史以故事白且曰
沈郎中云新鄭不能奪也而時多玄撰猶屬公具草
藁且曰是該司事公持弗具會又有旨建祠禁地令
黃冠祝釐公曰無等茲臥榻側而羽人闌出入非

祖宗防微至意又持弗建新鄭義不能難而懼以此失 上指患甚公移疾避之主爵者重公將推丞光祿公不顧竟歸歸而喪其母服未除卽家拜光祿丞踰年赴召則新鄭以首揆攝冢宰益貴倨諸附麗者益踰檢押公曰嘻甚矣復移疾避之又二年新鄭去明年公始出補尚寶丞則江陵爲政于時多用鷲猛士或軟熟就牢籠者而公質木彊項三歲始量移本司少卿旋轉卿于南益自初爲郎秩大品至是十九年始進一階云而自歲丁丑有奪情事公卿臺諫同聲貢諛公私于馬文莊曰三綱淪矣遂上書封公願

長乞身奉林壑不得命勉之南都會兩宮加恩封公
得稱符卿而公志益堅所知或基之曰吾曹故事不
得無書抵政府公與謝不從江陵母入京取道秣陵
送迎傾都邑獨公一人不出踰年年僅四十七耳竟
疏致仕歸歸而月旦之評彌尊部治若臺使者崑崙
劔華兩張公懷棘王公薦剡交公車矣又四年壬午
江陵卒正論大昌錄言事諸臣而識者猶有崇獎恬
退之指于是省臺中宇余公等相繼以公應詔丁亥
春起南京通政司右叅議葢家食者八年矣于時言
路乍闢士爭削牘抒所抱而公獨言士君子亦不得

已而有言耳若成弘盛時輶輻治辦正不在言且士
氣鬱而甫舒必溢溢則聽之者疑吾懼其更爲塞也
必使人人無溺職無侵官而後可以陰培國脉至於
今乃知公所見遠已巳丑擢貳奉常尋擢南光祿卿
條上六事如議蘇郡田糧省災民幾二萬石而頤儲
無虧辛卯擢南太常卿有薦新疏謂國初本取諸畿
內遠取非新且徒耗郵傳飽中人橐耳宜改派北不
報已陞大理卿刑部右侍郎俱南京公歷官久至是
始涉刑名顧一切附法簡訊又獨能不嫉熱審所平
反稱允有大獄連黜戚者部寺無能決公片語遂定

獻焉甥有庶弟殺兄而甚其病憤父以殺子首者已
又委罪奴已又陷其兄同母弟曰亦與知之公立記
竟赦罪其人他鋤得釋滯而哀無告諸此類無何被
召爲工部左侍郎時大司空曾公方辭榮出都門公
受命視篆一切奏曾公所經正條例從事顧獨念尙
方非時宜索不可程首奏言節慎庫見貯金錢九十
萬有奇而歲出溢于入者且十五萬更數年盡矣可
爲寒心請一切止傳造俾徵解稍前帑藏不空語甚
切至上爲心動而中貴人已目攝公顧取屢旨所
傳陶務嘗公公持之不報自是輒數月一傳奉公輒

持之 上亦輒不報公乃引 祖訓一款凡內官內
使傳旨各該衙門具本覆奏再得旨然後施行則覆
奏而未奉旨其不可行明矣亦竟不報然公亦竟以
此持不行迤邐年餘 上竟爲裁省諸奇巧難成者
悉五上而後得旨雖未盡如部擬而省亦不貲云浙
比不登先所傳織造夥遞留所歲供部司者耗更不
給當事束手幸公首疏減免省臣繼之遂相率援公
指以請公復盛言公私交困機戶流離 上幸寬之
而以名免卽不寬而饑民乃自免爾毋寧 上爲市
義懇懇幾萬言疏亦且五上得旨減五之一歲運亦

減三爲二度兩運所寬率三歲省一陰爲德不貲嗣
是亦鮮所傳袍段矣俄傳造蟒紗三千疋公又疏緣
四方水旱災異以請且言傳造未幾稱不敷用咎在
該監不節得旨減三之一於是公益感激涕泣明
主可與深言適安樂工興公又疏請罷其役且言陛
下亦宜平性氣愼起居以防不測忠懇所發蓋腹心
重臣難言之幸上寬仁不忤過而中貴人益氣奪
璫典幣者嚇上供人違式疏請卽訊公疏言鋪墊日
增所致璫語塞得不訊太和守祠璫請新諸幄公曰
是規欲得其羨爾度萬金宜已不已則請就以香緡

供織得俞旨璫大失望宿州守不應璫暴索被劾違
悞公謂違悞與騷擾罪均宜並聽嚴于臺使者守得
薄罰如公請水衡錢大蠹在預支姦商門通中貴人
始必或居間比出乃瓜分之商既自規得倖貲又有
所憑窟益折閱漁蝕無顧惜竟坐耗官錢庾次獄中
不得償比比公廉知其狀不給預支姦商窘甚而上
蓋臣者其魁也猶挾貴近人居間不得且見法一給
事聽不審顧謂公不宜重困蓋臣公恚曰吾以法杖
一訖法之商何至煩白簡遂直疏居間狀且言法不
可撓寧使臣乞骸骨而預支端必不可開 上遂摘

問貴近語何人公直疏其名 上姑不深究而有旨
張杜預支并禁囑托其人終不自安遂巡乞遠差以
出璫誠者爲司禮首一日因閱工語次詭爲 上詰
責誤內供事冀撼公復預支公危詞答之璫惶恐謝
去於是中外悚服 上神聖明察而公守正不阿爲
近習所憚因言者乃益著竟公在事實璫無敢有撓
者一歲間若河渠賑濟造船用數十萬俱出經費外
而所留羨千部帑更二十萬有奇云公於河渠講求
最久往來問河所從浚射分合瀦洩處甚悉一切隨
宜脩拔俾無薄陵無梗漕弊肅曲中多苦心而廷臣

紛紛上便宜公一意持審不欲爲國家妄興大役如
議膠河則遡勝國海運暨本朝王猷劉應節已事并
并覆說有害無利破其三資更明夫河海之舟不相
通宜罷議老黃河則計費百萬不若腰鋪省三之一
且大河口去清口五里復與黃會何能殺水勢宜罷
若浦口之議延亘七百里費五六百萬泗鳳二陵皆
所必經說更無當則直寢不覆公乃疏言近日河患
在河身日高高在清口則淮水不得出爲 祖陵憂
高在鎮口則閘水不得出爲運道憂必有以治河身
之高爲上策其次開腰鋪使黃讓淮以安 祖陵開

韓家莊使洩閘水以保運道爲中策若其他矣更置
者爲無策於是諸議盡寢而韓莊竣役漕艘安流腰
鋪業如公議將舉矣屬河臣以倭警暫輟 祖陵水
不得泄 上震怒更置其臣而分黃導淮之說亦竟
無以易公也公歸之次年而黃壩決侵符離而南公
聞之曰宜急塞緩則奔注不返徐邳且中苑而歲歲
憂運事矣後竟如公言兩河連江北諸郡大饑楊給
事繪中州流民圖以聞請度支水衡各出十萬緡賑
之公言此疏不負諫垣但職守常明 聖恩當溥得
旨戶七工三處辦并貸江北公又言救荒弭盜須兼

恩威 上亦采公議盜魁授首中州以寧公常言人
須辨得真爲國家之心毀譽恩怨不入胷中而後可
以論天下事或更以規公爲言路忤公曰不然大臣
貴據經守正耳首鼠彌縫是竊位也以故遇大疑議
毅然定國是無慮他曹如與戶部議河工協濟請改
漕百萬石石七環以五還戶部而二輸工作正供不
折而獲二十萬之用與禮部議各省試竟主遣京朝
官蓋廷論以公片語爲著蔡馬公雅故不欲出爲封
公強之行在事年餘諤諤守功令上下無援而獨以
身障狂瀾庠切黼黻關持 人主左右雖幸明聖優

客然亦艱貞以厲矣甲午聞封公有疾遂杜門三月
疏七上不得命竟以憂去 上特命公請賜祭葬又
令其子淮侍行蓋異數云公居喪簡出足跡不窺城
市終其身按治方公唐公李公疏薦者三廷推亞卿
者二正卿者一皆不果出自公謝事後貂璫益肆

天聽日高當事者斤斤譁其大者甚者日不給持籌
嘆懷思公共濟而公不可作矣傷哉公清真澹素食
不兼味衣不華綺動止尺寸森然擁書一室累歲月
不厭朝章國典鉅細精研真有得于寧靜淡泊之旨
以故獨行踽踽而樞持甚勇急公事不避怨與勞而

辭榮若浼瑰處一室而懸鏡甚遠自爲郎至符卿十九在告出亦多在南自勲卿至司空僅五年而乞身章至十五上每云吾官旦夕可去而後無負官使朝廷無可輕之大臣而朝廷重其大指可觀已平生無苟訾亦無妄交交成以淡以忠告蚤歲遊馬文莊之門與太倉相公友善迨秉政往復無間語皆以人心國是爲重太宰宋公御史大夫李公以計吏禁餽遺也公移書毋陽禁而陰啓之竇要諸公正人有以相信相取而不相忤如此余以通家托契曾與公飫而論易謬相合于朋亾尙中行之指已得公南中所推

薦諸君子疏讀之益信而狀所云鄭元宇少卿韓湖
南太守范中吳光祿蔡肖謙尚寶及其鄉錢兵部淡
庵李參藩臨川輩則名位稍亞而襟期俱表表蓋公
之所取於人者可知且公陰樹人而不使知者不可
名計事封公履未嘗有聲語不露氣謹候七箸微不
憚卽彷徨無容身地蓋老而猶若孺子然其行于族
有義田有義學有宗老會燕年之七十以上者族子
或不肖無端搆公直笑而置之事有拂意忍書不去
手晚更以耐庵自號嗚呼意深矣公之子寄公所緝
由醇錄及校刻七經小傳南部棠陰等諸書示余益

以見公學經學史學律非草草涉世漫應云爾者故
余嘗謂公所言乃天下之公言公所行乃天下之公
行其一種磊落光明更超然世味之外惟公質有之
而亦有不自覺是故上下三朝局更幾變而公之品
愈真事歷多難而公之用愈出暨乎處鄉處家閭然
不露而猶有堯舜君民之略老而不倦死而不亂臨
終朗吟一絕有一真還我獨蕭然之句真令人颯爽
起敬蓋定性知命非公其孰能之狀稱公恬淡如袁
邵公峭直如宋廣平先見如李獻可而醇謹欲過郎
中今而余益以兩語曰和易如程伯淳誠一如司馬

君實自謂非妄公之沒也山陰王相公南阜鄉公不
遠千里吊公嘆古栢寒松不可復覩皆惜公未盡於
用而世不可無公而予師太倉先生故嘗稱公朝市
中隱淪豪傑中處子皆定論乃若反復始終陳功考
行則未有如制詞之嚴而盡者嗟乎公可以不朽而
余猶吞嗟嘆懷于公者則以明主知公賢士大夫
知公而公猶有所不盡于用則公之所以愈不可量
而世之所以愈不可無公也公歷官蒙誥勅三郎中
以奏最光祿以郊祀恩尚寶以兩官恩沒而承誥一
論文一公生嘉靖癸巳壽六十有九配唐氏累封宜

人贈叔人先公七年卒子三長淙舉萬曆乙酉省試
次卽濯次卽演其他當詳誌中不具公所著有代庖
公案并由醇錄等書行於世所集有琬琰廣錄有西
吳琬琰錄有紀錄彙編有古文類鈔并其他疏議碑
記雜詩文若干卷藏于家

工部都水司郎中趙君泰墓表

王英

公諱泰字熙和其先居潞之神泉山曾祖諱均徙潞城上黨祖德新父賢俱樂善好德公資貌端偉制行淳恪補郡庠弟子員以禮經登永樂癸卯鄉舉明年試禮部中乙榜當授教官願入太學肄業尋歷政憲臺擢常州府同知廉以持已惠以及民勤以蒞事凡利民之務必爲之開孟濟得勝二河作魏村閘及郡城外東西二橋功成而民不勞歲旱齋沐禱於城隍大雨霑足蝗飛至郡焚香告天悉飛去夜夢城隍祠神指一女人云當辯其寃迨旦一婦人訴被誣當死

公以其事可疑乃廣詢博察得其情實事遂白歸得
不死奏減常官田重租修學舍課諸生進學其善政
甚多秩滿奏最天曹會河決東昌特陞公都水郎中
往塞河既興功時尚書周公爲侍郎巡撫南畿總蘇
松諸郡糧賦以責重大薦公協同都運詔從之公任
事以勤勞率民徵輸有法不侵其下吏民仰賴至是
以風疾而卒春秋五十有二公之爲政公恕平易所
至有聲稱及同周公督事不尚刻而政無不舉卒而
公悼惜之予亦知公之名以其賢能方當進用而天
不假之以年悲夫廼述其行俾刻石

夫之墓道以
重休於無窮

工部屯田司郎中余君汝弼墓志銘

王直

往年予友工部侍郎羅公汝敬巡撫陝西還予往造焉見其與客爲禮甚恭曰此吾屯田郎中余汝弼也小心敬慎直道不阿而甘於淡泊遇事不擇難易皆能有成功吾敬之未幾有以能書舉入翰林曰余謙者亦恂恂恭讓臨事不懈問之汝弼子也旣而聞汝弼以判員家居超然自樂無不足之意則歎曰汝弼誠賢於人哉世之以才自奮者往往據形便識事機制人而不制於人人亦莫之敢議惟質厚君子安義

命之正無機變之巧進不改乎其度退不戚乎其心
其汝弼之謂歟汝弼字廷輔而以名顯其先光州固
始人曾祖秉彝以明經教授鄉校祖存仁有隱德父
文寶元季避兵入蜀三遷始家荊州之宜都洪武丁
卯舉賢良以老疾辭汝弼少篤學學成領永樂辛卯
鄉薦遂入成均己亥選爲工部營繕主事滿九年陞
屯田郎中皆善於其職 朝廷再推恩以所居官封
其父母向氏加贈至宜人性孝友平居事親色養母
病侍湯藥不去左右每額天願減己壽益母年兄弟
四人怡怡相恭愛無少忤又喜赴人急里中嘗大疫

親戚不敢過門兄弟日煮粥偏食之死者爲埋瘞之
卒亦無恙其在國學時司業吳先生坐累罰役而困
於無資汝弼倒囊濟之吳公稱其有君子之風時數
遣諸生監銀冶嗜利者爭趨赴或招汝弼終不動吳
公亦器重之在京師廿餘年鄉人以事來者貧乏必
周給之無倦其教子弟及與人言必依於孝弟忠信
其爲人如此正統辛酉三月癸亥以疾卒年六十五

吳郎中瑞墓志銘

黃雲

公諱瑞字德徵曾大父璵妣高氏大父琬妣王氏父
鼎以公貴封吏部主事妣范氏封太安人公始知學
承父訓從經師授易雖由指授而義理之精多所自
得補儒學生弟子從游多所造就取科第官通顯者
相望崑山易學必推首焉成化戊子中應天府鄉試
乙未第進士戊戌擢南京吏部考功司主事適郎中
員闕署司事凡考百司賢否惟公雖權要不避故舊
不私辛丑考績階承德郎賜封父母及秋相繼丁外
內艱服闋改工部都水司出理徐州洪水利時諸商

載酒千艘經徐欲饋金如艘數先通公故人露饋金
意以義峻却故人信其操履介潔揚言於衆以譽之
其於洪事利則修舉害則剗革逾年而政通頌興弘
治乙酉秩滿赴部尚書與公舊相識或勸之私謁當
得美除竟不往陞本司郎中奏勅總督濟寧以南河
道值久旱舟膠不前公知而兼程抵任相宜從事鑿
新河濬舊河增壩開時蓄洩水通而舟前軍民稱便
高郵甃社湖風濤覆舟舟人多溺死公度傍湖田鑿
梭河延袤四十里遇風舟由梭河可免覆溺功成而
田賦額存民患之同事者議撥荒田補賦公以爲非

便上疏乞蠲除下戶部議卒如公疏至今利賴辛亥
以疾乞歸衆惜其勲業未竟而其歸志浩然宦成而
未嘗一日廢學在徐關齋於廳事左扁曰窮經公務
稍閒博覽簡冊旣歸杜門謝客惟知文事有賢名者
至則款接論議自帝德王道伯功逮秦漢而下制作
名家博極玄奧工古文辭求者戶履恒滿所著有西
谿集宦游稿居間稿退處二十年非公事不一跡公
門乙丑陳情致仕 詔進階朝列大夫爲人方嚴持
正人有過輒面白之若排難解紛包荒藏疾時亦有
之尤厚人紀弟貧妹寡生養死殯未及死者豫與資

爲備所親子爲人奴贖以金且爲授室君子多其厚德焉

奉議大夫工部虞衡清吏司郎中劉君汝靖墓

志銘

康海

君諱汝靖字安之其先澄城人也有爲萬戶侯者來
居渭南故世爲渭南人高祖敬祖生儀國初舉賢
良爲閭中簿生子鎬鎬生隆字文盛景泰庚午舉人
官至濟寧知州配宜人任氏生君與兄汝寧而君少
有異姿見者莫不以爲奇君益危襟正色無所動成
化乙酉濟寧公命從士人王寵受小學卽知洒掃應
對之節濟寧公以爲可教也遂盡從寵所學比濟寧
公罷歸渭南臨川伍先生至奇之以爲渭南縣諸生

季考渭南諸生則考君置第一補廩繙由是君騰聲
關輔間一時藩臬巨公過皆求試之故聲益揚關輔
士皆固以爲不如君也曩予見吏部尚書許公言爲
御史時嘗以喜雨及明皇幾致刑措二論試君甚嘉
此蓋其實事云然兩試甲午丁酉皆不利後浮梁戴
先生來提學重以君文爲奇謂君必首舉鄉試明年
庚子果中高等會試又屢不利乃思卒業太學益爲
瓊臺丘先生京口費先生所稱許而又屢不利至弘
治癸丑始舉進士時有例得依親君歸甫三月以爲
母任夫人旣不幸卒當承事濟寧公而濟寧公忽遘

疾不起君哀毀踰禮聞者莫不傷之丙辰冬十月拜
工部營繕司主事督修通州倉廩兼收放張家灣磚
廠料而二廠皆有中貴人兼轄十六衛官又習近京
畿驕縱有素君居三年無敢梗者此固處有其道云
爾予舊見蓬菴先生通州改建磚廠記言君以舊廠
去河五六里舟不能達磚至又顧車轉般每萬計費
八十兩天下財力取之不遺錙銖而蒞事者則每制
於法比牽於毀譽安常習怠以爲通患其有能深慮
却顧爲斯人圖便安者蓋寡矣磚自始陶至輪所費
已不貲又至轉般之苦萬磚所用猶可當中之產

萬萬計之當若何以歲繼歲積而計之當若何于國
以爲名言夫士以牽於毀譽不爲其當爲者何可勝
道君之所爲與違菴之所道安得使天下人人見之
庶幾乎可以興懦而起武使民恒得錙銖之寬豈不
快耶此後君轉都水主事奉命視荊州抽分滌弊正
理母所易借事竣價倍往昔戶部尚書以爲廉直爾
尋陞營繕員外郎命修秦簡王園能以禮裁抑使其
國弗軼往度其冒言正誼詳見家傳中今聞之尚凜
凜云還提督神木五廠尋又陞虞衡郎中提督盈甲
廠未幾繼母史夫人卒君以憂歸免喪也爲緝事者

言收繫錦衣獄正德丁卯五月獄成 詔免爲庶人
瑾旣誅始復虞衡郎中致仕徜徉爲樂纔八年爾又
痿痺不履明年乙亥夏四月庚戌卒矣君英毅豪爽
之氣由今觀之蓋寥乎無儔然亦止如是豈非斯人
之不幸彼僥倖汗穢乖刺不道者方且指而議之謂
君爲愚而其分何但堅白水火不相侔也又安知君
之云何語曰富貴不能淫威武不能屈此之謂大丈夫
此可以喻君矣君篤義樂善能急人之難渭南安
生程生與長安趙生皆客死太學不能歸君爲置棺
歸之此貴人所易忽忘故吾猶及之足以使人矚君

之細矣甲戌冬暮予如渭南訪君望君顏色雖病猶
如渥丹聽其言諭侃侃然古今之際道術之指纖細
曲盡益喜望君無恙乃歸而求諸已病者歷百數十
人始得異方亟以寄君則先吾方三日逝矣豈非數
之所定非人之能移哉於乎傷哉

奉政大夫工部都水司郎中張公瑋墓志銘

文徵明

正德初元逆瑾始盜專權翕張狡獪思蹂踐士大夫以恐警海內鈞撫細瑣橫肆羅織都水郎中張公寔首罹其禍公時領漕河奏績於朝俄飛語告變捕繫詔獄推考無所得乃以奉使時乘肩輿非制落職戍遼陽庚午更化悉召還諸流人公還以故官待次於家吏部奏爲浙江叅政不報久之再奏爲廣東叅議爲嚴州府知府皆不報閱數年丁丑十二月癸卯以疾卒享年六十有五公諱瑋字嘉玉別號歷齋其先

真陽人洪武初以赤籍徙隸蘇州衛曾大父聲遠大父宗德南京國子監助教父靜源累贈奉直大夫王部虞衡司員外郎母陳氏累封太宜人公少爲助教公所愛生四齡卽坐膝上口授經書甫成童已貫總羣籍乃益擇名士與遊時吳文定在太學遂從授業焉歸補郡學生成化癸卯舉應天鄉試丁未舉禮部試廷試賜同進士出身循例歸省丁虞衡公憂弘治庚戌服闋授工部營繕司主事奉使江西督造寧靖王墳辛亥還理部事癸丑分司杭州權商人竹木甲寅還部尋陞虞衡司員外郎己未進都水司郎中

領河漕事分司徐州庚申以疾賜告壬戌還朝復除
都水郎中領河漕如故公居官嚴慎所至率職抗權
塲舊多姦利往往商旅困弊而國課或不登公摘蠹
式法務平其值課溢有贏然不以羨奏蒞徐益樹風
聲釐革繕治必盡民利而軌法緒正不爲勢撓中貴
人道管內輒斂揖相戒避張郎中于時張郎中之名
聞江淮間赫赫若神明然卒以此掇禍尤事持廉
歷官二十年田廬服用乃損於舊晚歲益貧家徒四
壁晨夕餽爨或不時舉旣死室無一錢郡邑爲賻槨
始克就斂鄉人士共斂資葬之嗚呼若公者不亦誠

廉吏哉公事母夫人至孝方七歲時母夫人病日俄
夫公所在已而自外持藥物歸舉家驚異及貴自非
有故不輒去母傍赴戍時母年八十念無再見理日
夜悲泣泊歸乃康復愈前時至是與公相繼死人尤
異之公纖瘦多疾居常若不勝衣當被罪時貫索關
械荷百斤重校日夜暴市中市人傍睨竊歎莫敢近
數日旃竭氣息僅屬更兩日且死幸而不絕而配所
又邊朔寒苦非人所居蓋皆置必死之地而得不死
人以爲生平苦節之報庶幾後福未艾茲惟顯大之
基乎天其意者在此而同時罪人並前濯登用乃公

卒困以死嗚呼天邪人邪果孰任其咎耶

雲石岳先生倫墓志銘

孫陞

余嘗讀史至傑士弗究其用汶汶淹草莽以死未嘗
不掩卷而嘆也古今人不甚相遠若前工部郎中雲
石岳先生寔上谷傑士方今邊陲多警當宁憐才與
情屬先生將畀之重寄大立功名而竟一疾不起惜
哉先生每中夜抱膝籌兵食至曉不輟嘗遺書當道
其略曰糧餉空虛兵戍冗濫養非所用用非所養古
稱興師十萬日費千金矧以千金給坐食又云山西
京師之屏翰三關山西之咽喉三關有備則山西不
是慮矣又云兵貴精不貴多無選鋒曰北百里趨利

者蹶上將今調兵遠至自遼陝非計之得也嘗欲上
書闕下徧歷九邊分屯建戍選銳募勇起遼海迄
今蜀川修洪公舊業以扼潮河之險追王渙遺跡以
復興和之城徙朶顏諸夷于開平廢壘以大寧地內
屬振哈密屏弱之裔以制土藩又欲仿金元故事立
瀛海平濊諸鎮羽翼神京諸所經略既定則西羌
不敢窺甘涼而吉囊俺答無能猾夏也有志未就不
重可惜哉先生性剛烈遇事輒發然心極慈仁恤困
扶危古人不過俚夫有一言當理亦不忍棄少負奇
節以上谷僻壤寡見聞挾冊來京從學士許公遊許

公奇之壬午領順天鄉薦丙戌登進士第授行人使
汴歲歉見餓莩塞途還朝卽上免徵遺賑一疏詞
甚激切已復兩劾權貴專擅數十事遂落職爲山東
齊東縣簿稍遷山西曲沃知縣累晉工部主事員外
郎郎中職所宜舉不遺餘力會朝議羣臣才可往
諭安南者先生名在選中巳亥正月也駕幸承天先
生首諫止詔下禁獄凡六閱月獲賜罷歸上谷平生
憤激之抱時於聲詩焉發之先生美髯渥顏身長七
尺偉然一驍雄丈夫謂當達到而官止郎署謂必遐
享而年僅五十有一唐崔祐甫云主恩非臣下所圖

天命非生人所制詎不信然然宏才勁節焜耀於人
耳目海內稱英傑者必歸焉子魯應貢遊太學嚮往
未艾綽有父風將摻遺文以傳來世先生其不死哉
先生諱倫字厚夫雲石其別號也

司空大夫劉君伯淵陶政記

臨清故有司空分署歲遺屬大夫一人掌甕甌之政
登下其材以輕重算賈人船轉輸都官法甚備也其
後胥徒狎習剋敝巧法器多苦惡僦人告匱將作始
借前箸籌矣萬曆辛巳念廷劉君以起部大夫分署
于此至則召諸陶人問弊所繇安施而可乃稍得狀
蓋前大夫恐埴之無良也成而試其堅瑕委諸從史
陶則有賂又使軍尉別其良楮印而志之則又有賂
水陸轉送傭夫舟人僦賃出其中則又皆有賂四賂
誠具甕卽皆窳登也既有所闕甕雖堅白格也計所

予直不更其本而費若此矣君大概曰有是哉夫估
溢而器不精是縣官病也作業劇而費不償是陶人
病也財詘于縣官而賂出于陶人是公私交病也一
事而使公私交病祗役謂何乃下令自今已往試不
以從史印不以軍尉陸不以傭水不以舟使陶人自
相占也撓不如法以告匿則有坐陶人自相占以撓
無所用賄坐又不敢匿也得以其直盡之於埴而享
其贏餘甕皆益精將作受之無後令矣大夫旣遷去
陶人思其利相與礪石志之因省進士張君鯉以告
史氏嘗觀縣官舉事費往往倍蓰民間而功不能半

自古以然第所覩於國家自城郭宮廷下及器用服章無論纖鉅惟祖宗時所創咸極精良久而毋壞其後所費不啻浮於舊額而饒獮踰薄曾不能當其十一何工拙相懸甚也此無異故祖宗時法修令具上下無敢越卽有所興作財力相覆推視惟謹不使奸利賂請得滑其間不精何爲近世士大夫務爲弘度遠心簡薄吏職卽有所興作儻然受成不甚嘗省于是蠹弊日滋縣官謬其虛質而民騷然靡費矣旣已洞其弊竇卽又重拂人情取小補耳調劑幸旦夕毋敗以遺後人誰復執其咎哉予歎大夫以文儒名賢

優游華省不憚精心虛受聲華宿蠹如此可不謂勤
其官者耶夫埏埴之工于國計渺小矣第如君畫使
國家有實用所省公私之費歲又不下千萬假役有
鉅于此者盡如君畫所省費與其利賴又何如也在
昔有虞之裔爲周陶正維是甌窶之利大啓陳封傳
胙奕世古之重報功如此以大夫之利器用於國公
私賴之勞不細矣今者位益尊顯聲實烝烝垂光竹
帛不可涯涘尚何有于陶政然吾執此以俟大夫之
鴻樹與其懋賞而又以風世之勤其官者庶有益于
國也惡可以無紀耶大夫名伯淵浙之慈谿人第隆

慶辛未進士今官江右按察副使云

工部員外郎郭公璽傳

實錄

郭璽字文瑞城武人天順甲申進士初選庶吉士以請解館激怒李賢授工部主事時宦官黃順貴幸嘗有私囑璽叱之因誣璽侵削酷暴被逮責問復命搜其家惟圖書舊衣敝被而已 憲廟怒責順曰爾奏

郭璽如彼是誣之也黜之南京遂遷兵部主事松潘指揮楊安沒而無子族人謀其爵者賄當路已有成言惟璽不從卒卻其賄而置之法所善給事中間某嘗以忠義相期許問畜名馬玩好璽不知也一日誤爲所見遂與之絕剛正之聲聞於中外 憲廟嘗

書其名於御屏曰清介郭璽選員外郎卒今祀學官

工部郎中茅公國縉傳

李維楨

茅公名國縉字薦卿湖郡歸安人鹿門先生中子也
其先世詳先生傳中先生元配姚孺人生伯子翁積
貳蕭生公他母生叔國綬季維公少穎悟出語驚坐
客髫時補諸生已入太學結吳越間名士爲社有秋
水編四方傳誦之成進士奉使還里已謁選有密戚
當路懼公不任吏爲乞便地而得章丘其人有難色
公心獨喜世以貴介知昏菽麥請得此一洗之至則
進父老于庭訊所疾苦皆言邑徭賦雜紛吏鉤脈析
亂民疲奔命無所控告惟行條編法最便而當官者

奪於浮議不決公喟然曰吾爲若決之夫民有轉徙而無變異按地之有無沃瘠差次戶上下而賦與役繁簡輕重因之給由帖定款目有總收分解法民貧富相表裏官家力不支輒委富人肩一切重役富人倩人代役而積猾緣爲姦官復漁獵其中則富人削富者削而貧貧者削而斃耳于是除大戶不復用重役若里書禁子斗級鋪兵解馬之屬募於民費十募於官費一皆斷以官募廩餼如其直獨漕糧與派徵別爲一則里正歛之官任轉輸諸富人安枕卧老弱子女負擔至頃時卽去田野不聞追胥聲汰冗食于

官者二千人費踰數萬請還邑之代龍山青陽白山
供廩置者得四千金之一歲大旱請蠲存留金三千
易漕粟萬六千石賑貧雖窮里必身隱親澆浙而行
衆寂無譁而歲亦有秋亟貯粟二萬石已復旱臺司
請發內帑邑得二千餘金以其粟佐之設上虛位
災民鱗次受金粟叩頭呼萬歲聲震地明年蝗爲災
朝議令諸邑市臨德二倉粟而苦僦費趙趙不前公
自以倉餘粟貸約來歲償半息民歡從令以其贏轉
穀百數市粟相望于道使者行部見之爲之嘔嘆鄰
邑徵牛民間爲某公建坊公以帑金市牛往事旣則

給耕無牛者所日用取之家商不知有官而摘姦伏
如神訟者畏而退久之庭虛無人手一編吾伊而已
民家兒貧而慧者衣食之令就塾諸生貧婚葬不舉
者助之金田庚七十以上與帛八十以上加等孝子
弟弟貞夫節婦生子布粟表其閭歿予棺歛表其墓
五年以高第徵章丘傾國泣送貌象而生祠之拜御
史首薦海內名臣若干人不宜投丘壑又請豫教
太子而李中丞材坐事逮獄許司馬貽書救之某御
史以聞左遷許官二等公爭之強不能得聞先生病
耗請急歸明年計外吏某言是嘗以貴人刺求便地

坐當調章丘人憤曰賢令如茅公而人求多焉謂吾
曹無三寸舌耶詣闕白寃三百人而公念先生老築
園舍傍榜曰菽園與諸弟相戒以養先生志曰吾爲
國效標末功未竟冀之若若第往寄百里之命如吾
兩政何等不可世不乏百歲人何妄意父旦暮死耶
促就道公長跪涕泣因賓客以請終不許則有浙川
除流民嘯聚剽略聞公來曰仁人也願受廛而爲氓
爲轉穀以賑治廩以餉而邑所入諸罪人贖粟寓之
民家耗矣建倉三十七區儲萬二千石教民生產作
業農桑繫畜悉有法則民不虞饑修鄉約保甲法日

中倣焉而飭黷舍課生徒遂有成進士者凡二年不以遷客自倣傳舍其官百廢具興邑爲望國諸郡邑若上官以荒政若大計開決無不引繩墨切事情政聲籍甚擢南京屯部郎浙川人泣留如章丘祀之名宦尋以先生請急歸先生趣之如初三年除水部仍在南有詔取器用屏障諸不急物奄人昂其直以一爲十臺省不能爭公精心籌筭不得溢孝陵燈千六白金削爲三十六金他類是節慎庫舊貯七十萬金僅存五萬出入多寡相懸絕而傳造玩好費亦十餘萬乃上疏極論天地生財國家歲入止有此數鬱於

內必竭於外今市珠寶至二千四百餘萬太倉若掃而礦稅進獻厠大廡之下付宦豎之手竭脂膏取之以府怨而狼戾視之將以遺何人計甚左也 陛下發私藏以營三殿及諸典禮躬節儉爲天下先罷諸無益作則財相灌輸中外咸裕語甚切直疏上不報已攝篆鑄錢敷塞奸冒流泉無滯先生九十以使閩歸稱壽事竣之官權湖陰稅弛苛禁商旅如歸三月而課足當一歲李瑞欲稅湖陰如湖口公持之免九月復歸省而先生沒矣宦前後二十年出入數四卒得奉湯藥合殮人謂孝感服除除工部報最痛先生

鐫職非罪疏略曰先臣任粵西不煩軍興錙銖以鵬
勦收大征功蒙恩錄擢忽受顯黜一事而功罪迥異
何以示沮勸倭內犯東南爲墟先臣從督臣胡宗憲
畫策平之不敢希賞而更得禍比采廷議宗憲業已
洗雪先臣何辜沒齒不白臣請辭所應得勅命復先
臣致仕疏七上甫下所司以例不得復官僅予閒住
云已督工長陵奄人行千金與寬其額公麾使去所
餘木石須役數百人沒其稍食不許召有力者昇出
三日而畢已遷郎中視夏鎮河或言沮洳善病人不
可往公斥之人臣事不避難河不治則運道闕此何

事而可辭爲遂行特請勅以要束諸有司而延見士
民言河利害備采擇時泃河初成水淺易涸口隘難
旋建三閘注水鑿巨石而深廣之閉滿家閘築微山
湖堤堤工甫就俄旱禱于神泉湧出萬艘無留行鎮
民八百家籍之持炬嚴更役頗困罷之以閘夫代夫
精取諸縣而倖貳小吏職匪頒遞相侵公必手賦人
人沾挾簡鎮稍知學者爲塾師教子弟日省月試而
獎勉之其在兩邑拔士童稚中咸有聲兩入闈收名
士以十數鎮諸生聞風從遊數十人教養尤厚疾呼
掾具草分湖田若干頃充士費區畫歛散法以垂久

遠生平不信佛曰人生死如水聚而盈散而涸佛從
何修輪迴從何轉令浙川有道人贈之詩名震三吳
地官終古豫州公亦自占數在六九故孳孳爲善如
日不及遣妾不索聘題書與之曰納履瓜田瓜生未
破趙壁秦城總歸行路方與客飲誦秋風一夜起客
散孟嘗門之句客訝之一日詔其子吾將以閏六月
十三日逝無讀非聖之書無行不義之事是所望汝
問疾得無苦耶曰否但氣散不自持耳遂瞑鎮人相
向哭失聲恨醫者至毀其面章丘浙川聞訃哭祠下
如喪考妣初先生諸奴橫里中幾遭大禍而邑巨室

爲滌惡民所侮衣冠坐塗炭筮仕歸察諸奴猶有不
戢者泣而白先生先生矍然因治酒會宗人約曰吾
茅二百年善門柰何以奴故隕名請先治吾奴以徇
諸父兄弟自今嗃嗃爲政無蹈覆轍宗人皆諾爲
鄉里所安先生亦恨吾早不用兒計先生病疽日夕
不稅衣冠而侍而婦蔡亦病或請或視公訶曰吾婦
方急吾親親愈則起耳居金陵以樓船迎先生間游
諸名勝賓客旣集公鞬臂蹠上酒炙先生樂之與客
談詠興盡而返都人嘖嘖茅君能養志矣事適母因
母情禮委悉兩相歡伯兄才高而放數規之伯兄遂

疎公公執禮彌虔適母語伯兄若弟事我如若父若
何可薄而因母前卒每語及輒流涕不已撫伯兄子
如已子割腴田五頃差五服親疎而周其急名曰茅
氏義田又爲義倉積粟以卹凶荒族有售百金產者
三售三返其田蔡司馬子客死其遺服子幾沒豪手
牧畜之妻以女而名之武猶嬰杵之于趙孤也所過
見道殣必具槥殮之以舟載木綿裘衣寒者常數十
百人有婦抱絲而弔于市持其金還夫視之脂也相
持而泣立償之諸生逋稅當黜各予數十縑客五十
無子贈之婢舉子婢以貧夫爲決嫁還其夫請過時

不昏者必資之昏每言此天地生人大義也他所振
卹若嵇太史李司務嚴施二郡守沈儀部張塾師輩
吳興人歷歷道之矣先生以文章爲天下法程公承
受家學其文汪洋恣肆援筆千言詞旨俱美詩入盛
唐間與而大指以學在適用文在經世古今事成敗
人得失揆度鑒別無爽授之以政迎刃而解所刪評
漢晉南北史與所著菽園詩草藏於家者若干卷子
元儀舞象之年傾困粟萬石活餒人其行事文采大
有父風

舊史氏曰今天下多事矣說者東憂倭北憂虜余獨

以爲患在民江之北山之東河之南無歲不水旱民
不聊生易與爲亂此腹心咽喉地也視倭虜孰爲緩
急有如茅公爲令得人和勝於地利天時何憂患哉

工部員外郎劉公魁傳

唐伯元

員外郎劉公魁字煥吾泰和人由舉人嘉靖間判寶慶五年守釣州七年貳潮州六年而率以獎植風節闢邪衛道爲急所至各有生祠民久益思之陞工部員外郎上安攘十事皆嘉納有詔徙雷壇禁中公上疏自分獲譴先授家奴囊金三兩治後事然蕭然布袍一家奴隨邸中爾疏入震怒杖之廷入獄創甚有百戶戴經者藥之得不死日與楊侍御辭周給舍怡泮礪以不能積誠意感悟自責諸校爲之感動其年八月神降于箕乞宥三臣得旨釋放爲民未踰旬

復遣逮逮者至公猶在道先繫第元北行公至螺川
得聞卽買舟馳赴或勸潛歸不可賦詩以寄家人有
孤臣此日勞 明主萬里何心保此生之句抵京復
上疏願獻愚衷以死報國事其言切指執政奉 旨
仍舊監着明年祈雪不應獄禁加嚴不得食有校尉
楊棟者食之得不死明年官禁火赦還家公自幼稟
父訓躬操古行旣學於陽明先生堅志反觀動有依
據羅念菴題其墓曰公自放歸蕭然一布袍共倚宗
盟用嚴觀省又曰公大節炳炳如桂障川而小物隱
衷具可撰述雖用不究韜晦逾密而流風海宇有功

於師門也 唐伯元曰仗忠仗節之士世未嘗無而
往往徒激于一時者或非其質也乃若近代則又有
謬于 朝著而顧營苟于閭巷者其人益不可知
矣方晴川先生貳守吾潮時未聞有所建白也然而
潮人則已知慕先生余茲來其鄉而先生墓且宿草
矣聞之鄉人一口頌先生不置嗚呼孰謂先生近代
人哉孰謂先生而非其質哉

工部主事宋瑛傳

宋瑛字克輝華亭蕭塘人弱不好弄稍長知嗜學時兄璵已貴父欲令幹疊涕泣以辭讀書窮晝夜日食惟餽粥水豆人不能堪而瑛處之裕如旣領鄉薦益肆志于學務窮天下之理究古今治亂興亡之變期有以體之身心措諸事業天順丁丑廷試第四人出身授工部營繕司主事繕工典徒役與中貴人雜處瑛首絕干請屏豪猾求弊端所在而扶剔之人憚其嚴而樂其簡易然中貴人滋不悅思中傷之陰使人詐爲傭以偵其過失歲餘無所得更得其廉謹數事

加敬禮焉後偵者以語人人始知之甲申引疾歸時
年始四十五乃作延齡會以合族子弟願學者爲館
穀教養之遠方來受業者甚衆事母至孝居喪哀毀
有燕乳白雛于堂時人以爲孝感

工部營繕清吏司主事贈尚寶司卿何君遵墓

志銘

羅洪先

武皇帝朝瑾彬相繼用事縉紳往往以諫死死死者旣衆而瑾彬益橫好議論者以爲於事無益徒損聖德或謂其時偶以意氣鼓動遭觸不幸以死死非所得已者於是益慕爲持重之說以自解而莫或非之於乎其論何益循之死不知又將爲何說也彬導

上遊幸禱祠名山將入江南而寧濠方謀以侍子入朝倚彬內應比南巡詔下彬幸得便窺伺乃爲危言撼衆懼中阻衆亦相視搖手戒莫敢出可否語甚則

以諛言媚彬彬氣益盛兵部郎中黃華翰林修撰舒
芬首以疏入諸曹稍稍踵之 武皇帝怒罪華等彬
復揚言華旦夕且死冀以脅衆孟循業已入疏力言
淫祀無補敗亂辭極剴切且曰萬一宗藩藉口奉迎
潛懷不軌則福未降而禍已萌蓋指濠不諱也彬畏
事泄不復進御孟循性復謹默恥矜伐人亦未有知
者至是慮衆爲彬所脅又以華罪叵測復與同官林
大輅蔣山卿上疏乞自今罷巡幸勿爲左右奸佞蒙
蔽華等無罪願特寬宥毋使後世有殺諫臣名不爾
臣與同死彬彬旣欲杜衆口聞是言愈自懼則更四出

機穽旣下孟循等于獄陰多方拷竟苦之復嘆其黨
指劾言者懷奸訕上無人臣禮 武皇帝信之益大
怒榜示朝堂無得效尤遵等獄上被 旨荷校暴午
門外五日杖五十罷遣彬自請視杖杖者素視賄爲
輕重至是密奉彬意而賄又不至杖視他人嚴甚孟
循體故羸又憤所言不達而瘡潰骨靡不可復療越
二日竟卒正德己卯四月十九日也邸舍獨僮奴何
安一人當草疏時訢覺之前持哭曰主君縱不自計
獨不念幼子且今又垂空橐耶孟循執筆從容曰無
多言歸見大人爲謝萬死罪兒子令勿廢學足矣草

疏已書託鄉人太僕卿周金編修陳沂後事語不少
亂蓋是時一子世守方數歲孟循生成化丙午二月
十五日止三十四爾孟循旣卒南巡議亦竟寢嗚呼
若是者果爲不幸遭觸者耶其爲無益於事者耶孟
循自幼無他好垢衣糲食不稍見顏色性故寡合不
能與富人游父嘗令學賈心厭之願去賈爲儒或言
祿命不利則憤曰儒固有利不利耶正德癸酉舉鄉
試甲戌第進士吏部尚書陸公完聞其名延爲子弟
師未幾當試臺諫獨引疾弗出曰吾不可資人以進
丙子始拜工部管繕司主事明年摧木荆南故事多

昵奸胥踵弊承訛歲增羨以自潤甚則算及尋丈商人苦桎過於號虎孟循更置一切而復以廉率之無何出羨千金左右勸以獻績怒斥之曰來者將何繼耶乃令下商自百金下減算三之一風水敗貴者其勿算以羨足常數但令相等入算者手實其數幾何自孥之藏於郡帑數日一會所入數以等減算其或越貨敗令且以貴謁至者盡沒入之威惠並舉至于今守以爲權令比去權行李蕭然卒之日貧不能發待賻而後棺也於乎人莫重於愛生所資以奉其生者勢與利而已非位不足以據勢而利之所在必貨

賄而後通二者不可驟至矣而身之不存又莫得以
享其成夫然後死生日暮之際不得不繫于情也公
于臺諫司權如此是其處世真若飄風浮埃栩栩然
無所仰藉故進可以遂志退可以守身此其素定有
不俟決裂於臨變者而豈計其得已否耶人言南巡
之諫惟戶曹不與工曹三人外他皆聯署以進有避
而不署署而不往往而復規避者問之曰吾親老也
不然則曰未有後也於乎即使無二患矣自顧其奉
生之資有不盡享也其能決裂於臨變乎卽有不幸
而遭觸如孟循幸使不死其竟無優劣矣乎此可以

論孟循也孟循名遵其先吳江人洪武初以間左徙江寧高祖文廣曾祖澄祖瑄通星占曆數學天願間徵補天文生今通籍欽天監以季子鉞貴贈監察御史父鐸母王氏孟循被杖時鐸與家人墓祭歸有烏悲鳴而前心異之比抵舍聞工部有以言獲罪者鐸長號曰遵其死夫已而果然其素定之見信於父母蓋如此孟循以卒之年十二月二十四日葬江寧安德鄉梅山村之原又三年辛巳今上卽位褒先朝死事之臣誥贈孟循奉議大夫尚寶司卿封鐸如其官母與妻狄皆宜人遣官諭祭其家錄世守爲國

子生又十六年丁酉應天府請於禮部起祠祠之而
世守自刑部照磨權判臨江府爲政有聲三女適嚴
師泰金旦徐孝成皆士人世守三子應謙應豫應節
二女貞巽貞兌次第漸長昔之逃死者泯泯焉爾於
是人始以孟備之死爲榮然不自知其見困於率生
則又安知死之榮辱與榮辱之所爲辨也臨江使人
言曰昔世守幼不能共大事致有關典幸有以惠之
余嘗忿議論者之言不達於死者之心也因志墓備
書之於乎聞者其毋以余言爲無益也乎 銘曰謂
死爲足重邪人之死未必如公謂死爲不足重邪非

公死不足以風有慕公者求其所以其榮與否在其
後世

承德郎工部都水主事少山戴公鰲墓志銘

張時徹

公諱鰲字時化別號少山奉直公季子也方孩孺時輒聰慧絕倫見簡冊輒把之伊吾不置易以他物則奮然呼號人皆異之時奉直公有五子伯仲皆業儒也乃屬公治賈事公入城匿僧舍中聚書而讀焉又恥事學究見輒棄去不受束約自爲得師書過目輒不怠日誦數千百言比伯仲相繼舉進士公益振厲憤發諸經史百家言蓋靡不研綜爲文下筆滾滾不竭不啻川注而雲翔也補郡弟子員輒籍籍有聲校

學者大器之郡侯楊公最謂人曰戴氏千里駒又若是矣嘉靖乙酉舉于鄉入南太學師事甬川張公涇野呂公東郭鄒公講求性命之學博取反觀省踐切實而標格嶄然蓋已迥出儕輩諸學士大夫翕翕遵譽以爲茂才異等也乙未舉進士丁酉授工部都水司主事治徐州洪洪故有二道外洪大石獸踞小者戟列時時破舟殺人而內洪則紆迴滯澁沙石壅閼不可以舟又堤岸善崩齧而窪者太平公至則殫力經畫琢其巉岩碎其砦磧直其掩曲扶其壅塞以隄以路延袤二里許舳舻上下如履平地而數十年之

害一旦夷之督漕大司農約庵周公稱之曰通商利
漕錙銖不煩有司而刻日奏功卽肩巨任劇於戴子
何有哉徐故有義倉業已圯毀公輒修建廨宇儲積
粟麥以備艱凶適明年大侵發粟得二十餘萬隣洪
數百家賴以全活無一人轉徙者餓莩盈野召洪夫
與之粟而瘞之數日而盡逾月四方大疫而徐獨免
蓋不獨枯骼之蒙澤也已而父降生之辰南向再拜
跪而祝曰熬不孝竊祿遠遊幸天不降罰錫錫親康寧
熬死不憾輒涕下如雨爲之不食遂請于約庵周公
督河司空淺齋郭公求得謝事歸省不許遂鬱鬱不

解痰火上熾征忡疾作會竹墟屠公備兵於徐請之
曰殆矣以後事煩君謂內子曰數也弗憂第孝事二
親誨兒讀書力善死且不朽遂卒公仁孝天至率偵
伺幾微而左右之一日奉直公欲有所適期僮奴以
夜半戒弗聞於子婦夜則潛鑰公寢門公聽聲知之
乃擁衾以待聞奉直公起輒踰窻侍之奉直公驚曰
兒何由得至此與人無親疏輒惻惻見情素而恤災
救患尤所孜孜北上會試一同舟者得痢疾友各棄
去公獨周旋其間湯藥斂含靡不盡力南太僕思齋
陳公入覲與遊雲龍山而思齋暴殂公驚哭失聲出

已貲爲治斂事其應人緩急皆此類也平生好觀古
書墳典不去手詩希盛唐風格爲文雄俊警拔不吐
俗士語有少山集若干卷嘗取古人微言大旨治亂
興衰之故而自爲論說凡二十餘卷名曰經濟考略
又取經史訓典諸宏綱要旨類爲一集凡四十餘卷
名曰策學會元要皆公之緒餘未得竟究所長者也
家鄞之桃源曾祖鍾贈承德郎東昌府通判祖浩歷
任鞏昌府知府父價連城縣學教諭封奉直大夫南
京刑部員外郎母杜氏封宜人長兄鰲尋甸知府次
鰲宣義郎次鯨福建左叅議次鰲都察院右副都御

史

通鑑

綱目

卷之五

五

皇甫水部君濂墓志銘

皇甫沔

皇甫水部君者名濂字子約中憲公第四子也母黃氏恭人方姪時夢老人授以玉戒指一枚上負以鼎翌日語於中憲公公曰鼎男象而玉至寶也指者止也汝殆產子必貴自此將不復舉矣後卒如驗云吾家裔出微仲至宋公子充石字王父始以字爲氏宋亡徙安定朝那漢唐而下最盛勲業若規嵩隱德若玄晏文藻若湜與冉曾詳載諸史宋室南遷扈從來蘇居長洲遂爲吳人大其族者一善公高王父也諱通生信贈禮部郎王大父也生錄卽中憲公云官儀

曹時子約生於宦邸沉穎莊恪不爲嬉戲玩弄異
凡兒中憲公出守果州纔四齡鄉人有賈蜀者延余
兄弟中憲公諾之其寓湫隘室中僅容三人子約置
前席乃稱腹痛辭去歸愬於黃恭人曰兒雖幼獨非
果州子耶何得慢我鄉人聞之匍匐請謝執不復見
其毅如此若夫臨果不取俟其自得聞伎獨止習誦
如初泰瞻幼操子約有焉公旣謝守歸課兒曹日嚴
余兄弟互相摩砥子約外無華炫而中專精於學且
有大志戊子試于邑郡院皆首選充郡學增廣生甲
午舉于鄉時中憲公四子並起科第吳中以爲榮先

聘廉憲公顧棠女而顧無子業許出贅子約往婚畢
乃謝曰大丈夫豈賴婦翁產哉況二親在堂安可缺
侍平遂攜其妻歸後十餘年顧亦產子人多賢而避
之庚子承中憲公諱與伯氏冲仲氏淳暨余居帷中
讀禮暇輒揚榘藝文譏評詩法子約業益進甲辰試
南宮第二賜進士拜繕部主事非其好也越歲居黃
恭人憂時仲氏卒於構說爲御史所窘子約與伯氏
急難之所爲賦三鳥也詩載集中戊申起家太宰聞
公淵知其賢將授本曹同鄉忌之仍拜水部鞅鞅弗
豫俾典薪餼賈人每偽增其數以罔國利子約林而

按其罪不知其女司空文公明妾也令妾泣請公所
翌日蒞部召子約切責之子約抗言曰公掌國政乃
嬖於寵而聽賈人冒侵國財不爲發姦摘伏顧欲奪
屬下守法吏乎卽無司空城旦書如君上何公斂
容以謝而心銜之子是有荊州之役矣至則算無羨
婚商人便之先視權者爲同鄉顧子聞喪不奔多收
賈人稅以充私橐子約發其賕以千計乃誣子約不
畏簡書眷戀桑梓愆彼瓜期歲當察吏考功郎又嘗
所忌者議欲黜之少宰建寧李公默譁於衆曰吾知
水部清介士也世值才名安得枉措以壞銓體僅調

河南藩司理官子約聞之卽日就道遵故鄆眺章華
浮沅湘之洞庭爲文以弔屈賈適黃州登赤壁脚蹠
賦詩興慨焉以余舊竄地也其蒞河南也諸司疑獄
賴以平反茲地也何李餘風在焉故多談藝之士樂
與之遊藩王好事擁轡置醴以招延之卽枚叟遊梁
陸生入洛聲籍甚焉居亡何稍遷興化作監司交與
賚以金幣並却不受緘投司中上官病其矯而性有
莫可奪者當是時施寇起於洛中倭夷熾於江左頗
懸故國之憂其蒞閩也攝郡篆嚴戢豪右謝絕請託
庭若無人同鄉劉君鳳以待御謫推又同年也日與

探歷山川寄情觴咏造仙遊以流連聖武夷而寄款
雖簿書填委特坐嘯可辦耳壬子乙卯兩典二省場
屋試文半出其手所拔皆才俊人服其蕙鑒云丙辰
代守入覲歸卽投劾不赴郡監司督之堅辭以謝開
府胡公宗憲擬以治軍薦督離鄢公憇卿擬以遺賢
舉皆移書謝之何異嵇康之絕山公耶越歲子乘卒
又二歲顧安人亦卒安人有令德乘幼最孝嘗割股
以療母疾者也並有別傳載夫以子安子約之文不
得爲第一父子並起上官兄弟皆承譴不顯豈文章
憎達殆運命司之矣丁辰茶酷居嘗鞅鞅弗豫頗有

愛生之嗟素沉靜寡慾所至脫略勢利自稱方外物
色異人好覽鴻寶玉笈之書求圓金服食之法足跡
不入城府戒開者勿妄通賓貴人亦罕至者署門掃
軌不以爲嫌曰昔人友麋鹿而侶魚鳥衲子羽流可
與晤言奚取斯輩汗我門逕哉臺司餽遺並却不受
持衛生之誠不欲勞心苦思遂少撰述惟詩篇每興
到占屬不爲應酬日臨晉人帖問圖花竹水石並臻
佳絕少學琴於雲間張氏盡得其法而晚更精悟追
契褻牙每鼓一二行蕭然自適曰此足玩世遺藥矣
辛酉子采生日弄以娛始得舒其首宇耳嘉靖甲子

秋忽患痢不治而卒年五十有七悲哉工曹視權者
往往操巖致裕鮮一二清白者吳人以此疑子約不
知死之後殯殮暨喪葬之具贍自余也所著有道德
經解校輯玄晏高士傳中憲藩府政令以昭先業余
收其遺草選爲水部集二十卷行於世

焦太史編集國朝獻徵錄卷之五十一終